


14740

INVENTARIO N. _____



**GODOF. GUILIELMI
L. B. DE LEIBNITZ**

**NOVA METHODUS
DISCENDÆ DOCENDÆQUE
JURISTRUDENTIÆ**

**EX
ARTIS DIDACTICÆ PRINCIPIS.**

GOD. GUIL. LEIBNITZII

NOVA METHODUS

DOCENDAE DISCENDAEQUE
JURISPRUDENTIAE.



PISIS AN. MDCCLXXI.

SUMPTIBUS AUG. PIZZORNO S. P.

e Constantinum

35

Rituum & Sancto

Regiminis Pontif

ammativa, huc co

etorica Legalis 46.

Didactica §. 47. h

ud

ejusque } run

ubi

Synta

mentare, Histo

idque } Term

Praec

geticum } Serie

Instit

emicum, circa

erum §. 99.

Tempus Comput





CHRISTIANI L. B. DE WOLF.

A. 2

dae Docendaeque Jurisprudentiae, quam in itinere omni librorum apparatu (§. 34. p. 2.) destitutus is conscripserat, ut in bibliotheca instructissima confectus videatur, & aere ac subtile auctoris acumen spiret. Diu libellus hic desideratur & a multis frustra quaesitus fuit. Merebatur itaque, ut denuo recuderetur. Sunt tamen nonnulla, quae moneri consultum ducop. Scripsit, quemadmodum dixi, hoc opusculum **LEIBNITZII** US, vix juvenis factus. Quoniam vero per omnem aetatem, quamdiu vixit, in omni studiorum genere indefessus haesit, & veritatis amore nihil umquam antiquius habuit atque carius; mirum sane videri minime debet, quod in nonnullis, quae juvenis olim statuerat, postquam ea severiori examini subjecerat, sententiam suam mutaverit. Ita e. g. in theoria motus concreti, quam sibi juveni excidisse ipse confessus est in Actis Eruditorum, quae Lipsiae eduntur, admittit vacuum, & materiae non tribuit nisi simplicem extensionem ad motum atque quietem prorsus indifferentem, nec alia agnoscit corporum elementa, quam particulas mole ac figura differentes: quae tunc temporis communis erat philosophorum sententia, a sapientissimis eorum **CARTESIO** atque **GASSENDO** approbata. Enim vero ubi iudicio magis limato & polito perpenderat inextricabiles difficultates, quas hypothesis illa offert, & quam ea abhorreat ab omni ratione evidenter perspexerat, nullam eandem fecit, quumque omni animi con-

contentione in naturam corporum inquireret, ea sine vi activa concipi non posse, nec sine vi, qua omni mutationi resistunt, quae aliunde venit, didicit, tandemque agnovit, phaenomena ista intelligibili modo explicari minime posse, nisi admittantur substantiae simplices, quas *Monades* appellavit. In eo autem sibi adeo satisfecit, ut mihi dixerit, se suum de *Monadibus* systema eodem rigore demonstraturum, quo Euclides ac veteres geometrae theoremata sua demonstrarunt, si animum huc appellere per alia vacaret, nec se propterea a multis jam annis amplius legere quidquam, quod de principiis rerum materialium in lucem ab aliis editur. Videant ergo, quo jure LEIBNITZIIUM praecipitantiae cujusdam in judicando, & nescio cujus defectus acuminis accusent, qui in iis, quae nondum satis explorata olim juveni placuerant, sibi reperisse videntur non quod pueri in faba, & iis audacter tamquam ipsi ignorata objiciunt, quae solidiore discussione facta animum sciendi cupidum exsatiaverunt. Quod si cui gloriosum videatur perspicacia aequiparari LEIBNITZIO juveni, an non is famae suae melius consulere, si acumini suo diffidens hebetudinem ingenii sui agnoscere mallet, quod ea perspicere nondum posset, quae LEIBNITZIO viro innotuerunt: postquam omnes ingenii sui nervos in ea exploranda intenderat, publice tamen magis indicavit, quam sufficienter explicavit, ut, quemadmodum dicere solebat, fungere.

geretur vice cotis. Sane si **LEIBNITZIO** juveni haec excidissent, dum nimia ac multivaria lectione obrutus omnia concoquere non poterat, excusatio erant fastus, quo quis eodem acutior videri affectat. Verum enim vero non opus est, ut exempla e longinquo petamus, quibus **LEIBNITZIUM** maturiori aetate in nonnullis mutasse sententiam suam, & a vulgari-
bus opinionibus, quas juvenis amplexus fuerat, discessisse: occurrunt talia quoque in praesenti libello. Certe quae de infusione diabolica (*part. I. §. 9.*) tradit, ea cum systemate Harmoniae Praestabilitae, quod postea demum invenit, minime consentiunt: consequenter dubitandum non est, cum in aetate provecta opinionem nullo fundamento nixam rejecisse. Huc etiam pertinet, quod (*§. 35.*) animum nostrum causam motus corporis pronunciet, ut ideo juvenis falso sibi persuaserit, se in Pneumatica & Philosophia Practica propriis meditationibus ad certitudinem mathematicam pervenisse: neque enim illo tempore eos adhuc fecerat in Mathematici progressus, quos postea demum fecit, ubi Parisiis degebat, & consilio Hugonii, Mathematici consummatissimi, usus in ima adyta scientiae penetrabat. Quamobrem quoque nullus dubito, **LEIBNITZIUM** aetate maturiori minime probasse rationem, quam reddit (*part. II. §. 3.*) cur & quatenus Testamenta sint juris naturalis, quippe quae magis ingeniosa, quam solida est. Haec ideo moneri non abs re esse duxi, ne
quis

quis LEIBNITZIIUM sibi adversarium confis-
tuat in iis, quae ipse tamquam a veritate aliena,
mutata sententia rejecit; & ne quis contradi-
ctiones fingat, aut inscitiam accuset in illis,
quae, accuratiori examine facto, ad errores
vulgares retulit. Alterum, quod bene notan-
dum, hoc est: In praesenti opusculo LEIBNIT-
ZIUS multa promittit ab aliis neglecta, quae
dare voluit. Exempli loco esto Theatrum Le-
gale, & Historia Juris Romani Specialior, seu
Liber de Auctoribus Juris Romani (de quibus
vide §. 29. *part. 2.*). In primis huc facit Ca-
talogus Desideratorum in Jure, libello huic in-
fine adjectus, & ex eodem excerptus, quem
proxime minuiere pollicitabatur. In nullo tamen
fecit promissis; etsi vitam satis longam in solo
otio litterario confecisse videatur; quum enim
haec scriberet, ad professionem quamdam juris
in aliqua Academia adspirabat. Quod si votis,
quae tunc ipsius erant, respondisset eventus,
nullus amplius foret Catalogus Desideratorum,
& alia opera egregia prosterent, quibus juris-
prudencia fuisset ad id perfectionis fastigium
evecta, a quo adhuc tam procul abest, quam il-
lo tempore, quo Catalogus Desideratorum con-
debarur. Quoniam vero longe alia fuerunt LEIB-
NITZII fata, quam praevidere potuerat, quum
unus homo omnibus non sufficiat, deficiente
tempore, si vel maxime non deficient vires, a
Jurisprudencia ad alia prorsus studia avocatus,
de iis, quae ad Jurisprudenciam perficiendam

tendunt, cogitare, haud quaquam potuit. Non est quod objicias, LEIBNITZIUM quoque maturiori aetate multa promississe, quorum nihil perfecit, veluti Scientiam Dynamicam, Scientiam Infiniti, Geometriam Situs, commercium Epistolicum, commercium Epistolico Anglorum opponendum, aliaque non minoris ponderis ac utilitatis. Quum enim nihil magis curae haberet, quam scientiarum incrementa, & ea promovendi cupidine inexsatiabili flagraret; si qua occasione ferente ipsi incidebat cogitatio de iis, quibus perficiendis vires suas pares noverat, ea quoque perficere sibi proposuit. Ast quoniam tempus non est res venalis; quod volunt vota, tollunt fata, nec homo sese obligare ad id, quod haec reddunt impossibile. Ceterum etsi praesens libellus a LEIBNITZIO juvene fuerit conscriptus, & quamvis ipse in nonnullis, quae rem ipsam non contingunt, mutaverit postea sententiam suam; hoc tamen non obstante, in illo reperient etiam seniores jurisconsulti, quibus eorum conatus in perficienda jurisprudentia juvari poterunt, & ipsum hoc opusculum monumentum excelsi ingenii est, quo inter primi ordinis eruditos eminet LEIBNITZIVS. Faxit Deus, ut publica utilitas, quam se quaesivisse in fine profiteatur auctor, promoveatur. Halae, d. 24. Aprilis, an. 1748.

PRAE.

P R A E F A T I O

A D L E C T O R E M.

N Escio an praefationem tibi debeam, benevole lector, quum tantilla Scheda praefationis instar prope tota haberi videatur. Sed tamen mos mori publico gerendus est. Ehodum, inquires, cur ergo tu nova libro moliris, quum molis forma libri? Quia, inquam, haec ad decus, argumentum scripti ad necessitatem pertinet. Sed sunt hodie nonnulli, qui caligant in tanta luce mundi, maluntque, inventa fruge, glandibus vesci; horum odia omnibus imminere, qui meliora moliuntur. Ac jam olim *Laurentium Valsam*, quod dialecticam ac moralem Philosophiam reformasset, contra furorem Sophistarum vix potuit favor regius tutari, quemadmodum in Apologia ad Pontificem Maximum ipse narrat *Petrum Ramum*, Professorem regium, qui Aristotelem examinare, quam sequi maluerat, omnium tota Gallia Germaniaque paedagogorum odio exercuerunt, donec in Parisiensibus illis nuptiis Aristotelis Manibus immolaretur: quis *Galilaei*, quis *Th. Campanellae* fata ignoret, quorum alteri exilium minati sunt, alterum lento carcere presserunt: *Nicodemus Frischlinus* a Collegis suis ad mortem usque passus est persecutionem, & tamen de igrammaticis tantum quaestionibus certabatur: Nec minus *Gasper Sciop-*

pius novis suae Grammaticae Philosophicae regulis, ad compendium tamen discendi mire accommodatis, odium omnium per Italiam pueritiae ductorum in se concitavit: nihil de Renato Cartesio Philosophiae, nihil de Guilielmo Harveyo Medicinae reformatore dicam, quorum nullus invidiam aequalium, nullus odia vulgi effugit donec emicuit veritas, & in ipsis saepe calumniatorum animis triumphavit. Nos nihil ad tanta nomina, si proprias tantum meditationes, non magorum virorum reperta proferremus, quorum nullus est, qui non meliorem docendi rationem desideret, quam nonnulli in liberorum suorum ingenii experti sunt. Reperias enim hoc tempore pueros plurimos, doctissimorum plerumque filios, ad miraculum usque in prima aetate eruditos, non tam ingenii magnitudine, quam arte institutionis. Judicium enim, etsi ante annos non veniat, potest tamen & in pueritia interrogando excitari: hoc enim voluit Platonis reminiscencia, exhibitumque specimen in Menone, ubi puerum Socrates a primis sensuque manifestis, nihil docens, interrogando tantum, ad ea deducit, quae vel subtilissimo cuique negotium facessant, incommensurabilitatem scilicet diagonii & lateris in quadrato. Haec non desunt qui fateantur sed singulares quaedam in contrarium rationes habent, scilicet doctos esse jam tum nimis multos: & praematuram institutionem obtrudere juvenes officiis, auctoritate experientiaeque carentes; surrecturam sciolorum

rum

rum segetem, cavillatorumque rudioris senectutis; sequutura praecipitia consilia, & quaecumque sunt mala juvenum Senatorum. Sed hi consilia nostra aliorum accipiunt, neque enim id agimus, ut cito juvenes ad munera publica veniant, sed ut digni. Quia enim vita brevis, ars longa est, non potest nimis institutio accelerari. Erit hoc manifestius, si de tota studiorum ratione (et si jurisconsultum in primis formandum susceperimus) in limine ad majorem sequentium lucem differemus. Nam & *Hugo Grotius* in egregia de studio politico ad Beniaminum Aubrium Legatum Regium epistola, & *Christophorus Colerus* in alia ejusdem argumenti, & *Gisbertus Voetius*, *Meyerusque* Bremensis in Bibliothecis Theologicis, ac *Michael Havemannus* in Amusio, tum etiam *Henricus Moreelse* in dissertationibus de Studio juris, a tota studiorum ratione rem repetiere, perque omnes se disciplinas diffundere: quarum in corpore juris vestigia reperiri demonstratum a nobis est in *Specimine Quaestionum Philosophicarum ex Jure Collectarum*. Si cubi labimur, benevole lector, cogita quam saepe utilia suadeamus, & compensatione facta errorum obliviscere. Denique sic habe, nos quae facienda discendaque dicemus, minime gentium omnia ipsos fecisse vel dedicisse; absit haec a nobis jactantia, quia olim haec a nobis rerum cognitio absuit; sed nos crede fungi vice cotis, acutum reddere quae ferrum solet, exsors ipsa secandi. Ita vale, & nostra sive placent, sequere, sive displicent, perfice.



P A R S I.

GENERALIS, CETERISQUE FACULTATIBUS
COMMUNIS.



De Ratione Studiorum in universum.

§. 1. **S**tudiorum ratio est species quaedam rationis status, id est, modus pervenien-
di ad statum actionum perfectarum.

§. 2. *Status* autem iste dicitur *habitus*, quem definitio, agendi promptitudinem adquisitam permanentem.

§. 3. *Subiectum habitas* est quidquid actionis capax est: nam & inanimata certis actionibus assue fieri posse constat. Ita chymici multis circulationibus spiritum vini volatilissimum reddunt, & multis distillationibus ac cohobationibus cum menstruo, ipsa metalla sup a albembicum itura, communi consensu docent; laminas etiam multis flexionibus habitum certo modo resiliendi acquirere docuit in elementis de Corpore Tb. Hobbes.

§. 4. *Bruta docilia esse dubitare non potest, qui vel Hyer. Rorarii libellum, vel Pliniana elephantis funambuli miracula, vel elephantis canisque panegyricos in Lipsii Epistolis legit; quae*

omnia credibilia fecit Viennense nuperum choreas ducentium equorum specimen.

§. 5. Quumque infantes extrinseco rationis usu primis annis a brutis parum differant; informatores eorum a brutorum doctoribus nonnulla non incommode mutabuntur; habent enim peculiaria sua artificia magistri equorum, canum, avium, in loquendo, canendo, venando.

§. 6. Generale autem instrumentum est escae, quum parent, copia, quum abnuunt, denegatio.

*Quis expeditis Psittaco suum χῆρι,
Corvos quis olim concavum salutare,
Picasque docuit nostra verba conari?
Magister artis, ingenique largitor
Venter, negatas artifex sequi voces.*

Ita balearica gens narratur non prius cibum pueris praebuisset, quam propositum scopum tetigisset, &

pueris dant crustula blandi

Doctores, elementa velint ut discere prima. Ab hoc more restat in nonnullis scholis convitum habentibus, poena jejunii, *das cariren*.

§. 7. Licebit hoc artificio ad infantes uti, non vero in liberalia ingenia jam ratione utentia, quibus pro pabulo corporis objiciendum pabulum animi, id est, honor. Unde ortus est classium, locationumque in scholis trivialibus, & promotionum in academiis mos: & olim qui egregie steterant, a ceterorum puerorum corona cum laude domum deducebantur; quod exemplo Ciceronis constat.

B 4

§.

§. 8. *Tantum de subiecto habitus: causa vel modus acquirendi est vel supernaturalis infusio, vel naturalis assuetudo, quae in sentientibus, quae talia sunt, dicitur Doctrina.*

§. 9. *Infusio est vel divina, vel diabolica. Divinae exempla habemus in dono linguarum apostolico; etsi quidam ultra illam ecstasin durasse non putent, quo sensu non esset habitus; quia non permanens. In historia ecclesiastica simile habemus exemplum de S. Ephrem Syro, qui precibus Basilii Magni subitam linguae graecae cognitionem obtinuit. Nostri temporibus infusionis diabolicae in mancipia sua exempla non desunt, nec hodie omnis infusio divina abesse putanda est; hoc enim sine divinam studiis nostris benedictionem imploramus.*

§. 10. *Ab Infusione properamus ad assuetudinem, quae fit per actionis imprimementis quantitatem. Quantitas autem est vel extensiva, vel intensiva: extensiva consistit in actionum multitudine, intensiva in magnitudine; seu ad habitum imprimendum fortitudine. Prius requisitum etiam vulgo notum est, quum dicunt, habitum comparari crebris actionibus, de posteriori silent.*

§. 11. *Multitudinis, seu crebritatis in agenda efficacia confirmatur vulgari illo,*

Adde parvum parvo, magnum cumulabis, acervum:

& Ovidius canit:

Gutta cavat lapidem, consumitur annulus usu;

Et teritur pressa vomer aduncus humo.

Qao

Quo pertinet Aesopi Testudo Aquila celerior,
& Germanorum proverbium: *vver langsam geht,
kommt auch nach*. Hinc fluxit illud generis humani
artificium, rem, si tota oppugnetur, insupera-
bilem, per partes aggrediendi: limā marmora
scindimus, montes corbibus avehimus, situla
lacus exhaurimus: ita in arithmeticis ingentes
summas per partes computamus, & in geome-
tricis campos in triangula partimur.

§. 12. Nata est ex hoc principio *repetendi
necessitas*, a qua praecipue ultimum habitus re-
quisitum, *permanentia*, dependet: usu enim com-
pertum est, alios figuras celeriter accipere &
amittere, ut tabulam ceream, alios utrumque
tarde, ut aeneam: quemadmodum alii flammam
irarum celeriter accipiunt & amittunt, ut sti-
pula, alii utrumque tarde, ut ferrum ignitum.
Hinc Pythagorei negabant, quemquam omnium
capere debere, antequam

Omnia totius reperiverit adla diei:
repetitionem enim nocet esse nimis dilatam in
annum usque, ut vulgo in scholis fit, sed decet
sub noctem diurna studia, exitu septimanae sum-
mam dierum, exitu mensis summam septimana-
rum, & fine anni summam mensium reperendo
summari, & ex singulis gradibus notatu dignis-
sima ruminari, quod nescio, an hactenus ob-
servatum sit a quoquam.

§. 13. Ex eodem fonte insignis didacticus
Vilhelmus Schickardus mirabile Hebraice
guam docendi derivavit artificium, quod



rologio suo ipse exponit: scilicet 12. pueros simul instituit, in hos grammaticam sic partitus est, ut alii regulas nominis, alii pronominis, &c. alii partem hanc, alii aliam syntaxeos tribueret. Ita factum est, ut, uno recitante aut respondente, ceteri attendentes, portione eius tandem ludendo discerent. Et hac ratione hodieque in scholis deceret non pluribus idem assignari, sed lectionem in singulos distribui, qui simul juncti egregiam tandem harmoniam constituent.

§. 14. Et tantum de *multitudine actionum*. Sequitur earum *intensio seu magnitudo*: nam saepe una actio, singulari quadam vi imprimendi facta, plus efficit multis repetitionibus; v. g. facti alicujus singularis, joci inexpectati, actionis cum singulari nostra fortuna conjunctae, v. g. quae laudem vel pudorem nobis peperit, facile meminimus. Ex hoc principio infra (§. 23.), ubi de *mnemonica*, ostendemus notas, quo sensibiliores sunt, hoc plus ad memoriam efficere.

§. 15. Consultissimum autem est, *multitudinem, magnitudinemque temperare*. Quod fit egregie, si, a minimis incipiendo, continue per gradus ad summa crescat actio: quod & chymici circa regimen ignis in assuefactione inanimatorum jubent. Milo Crotoniata memoratur tali artificio sibi robur comparasse: vitulum quolibet die semel ad certum usque locum portabat; ita, crescente vituli pondere, crescebat insensibiliter quoque robur Milonis, donec ad extremum grandem
Tau-

Taurum in Olympicis Ludis, spectante tota Græcia, gestavit. Eadem ratione possit & ars bibendi disci, si mensura singulis septimanis per vitra augeatur. Ita conjecit Gallus ille, qui quum in Acidulis Sualbacensibus cerneret Germanos aquae bibendae magis magisque continua auctiore assuescere, credidit hunc esse ludum potatorium, *eine fauf-schule*, ubi Germani in aqua discant, quod in vino sint praestituri. Infantes quoque a literis per syllabas ad voces tandem legendas veniunt; & in arithmeticis quanto magis numeri sinistrorsum recedunt, tanto magis in decupla ratione crescunt. De gradibus repetitionis vide, quae (§. 13.) diximus. Idem in oratione aliqua verbotenus ediscenda commodissimum, si primo recitetur primum comma, deinde primum & secundum, denique primum secundum & tertium &c. quod & in nonnullis muliercularum ludicris usitatum est: qua ratione mirum, quam facile totum memoriae imprimatur. Ignoscat mihi severus lector, quod harum nugarum exemplo utar, quando constat, nos in nugis, quam seriis docendis, ingeniosiores esse.

§. 16. Et haec de *Assuesfactione*, seu causa habitus etiam sensu carentibus communi: veniendum est ad *Doctrinam*. *Docere* enim est habitum efficere in sentiente, qua tale est, seu per sensum. Unde tota haec ars dicitur *didactica*; nam & qui sponte discunt, se decent, hinc iis *autodidactae* nomen (a):

§. 17.

(a) a seipsis doctorem.

§. 17. Quemadmodum autem Medicina se habet ad animalis corpus, ita *doctrina* ad animam: quumque medici sit curare 1.) tuto, 2.) cito, 3.) jucunde; consequens est, idem & in cura animae requiri, nempe ut doceatur 1.) *solide*, 2.) *cito*, 3.) *jucunde*. Ex quibus primum facit ad esse, reliqua ad bene esse; primum ad ipsum habitum, reliqua ad modum commode introducendi. Primum autem duo continet, tum ut *vera* doceantur, tum etiam ut *firmiter* implantentur, ne cito elabantur; nam & medicis recidiva cavenda est.

§. 18. Et illud quidem, ut *bona* doceantur, pertinet ad *objectum habitus*; de quo infra dicemus; ut vero *firmiter* implantentur, efficit *actionum multitudo*; ut *cito*, efficit *magitudo*: quae sunt causae habitus inanimatis communes, de quibus (§. 10. *seqq.*) satis dictum est.

§. 19. Ultimus vero scopus, ut *jucunde* doceatur, proprie hujus loci est, qui in animalia tantum cadit: in animalibus enim singularis quaedam ratio est ipsa ita assuescendi, ut sponte sese ad doctrinam recipiendam capaciora reddant quod fit voluptatem iis praestando, quum discunt, dolorem, quum aures obturant. Idque in brutis fit esca & blanditiis, in homine utilitate tamquam esca, & honore tamquam blandimento, de quo jam praecipuimus dicere (§. 6. 7.).

§. 20. *Jucunde* autem discunt, tum si *finis* jucundus ipsis proponatur, tum si *media* discendi

di sint jucunda. De *sine* (§. 19.) dictum est. *Media* discendi jucunda sunt, si ludendo docentur: quo mirifice faciunt comoediae & fabulae. Hoc *sine* confectae sunt cartulae lusoriae, geographicae, astronomicae, historicae, chiromanticae, &c., & Tesserae alphabetum continentes, quarum meminit *Hieronymus ad Paullinam*: item sales, epigrammata, picturae, carmina, memorialia. Quo pertinet *ethica picta* egregia, Principi Juventis Altenburgico, quem fata terris tantum ostenderunt, destinata, Emblemata *Alciati*, *Saavedraeque* Politica, & *Hutteni* Theologica in Schola Cordis, & ludus, ille artificiosissimus, cujus meminit *Fr. Christ. Rosencruuz* in Nuptiis, ubi ad modum ludi latrunculorum virtutes in albo, vitiaque in nigro habitu mira in se invicem arte pugnabant.

§. 21. Diximus primum, de causa habitus, inanimis bruti, & hominibus communi, nempe *assuesactione* (a §. 10. ad §. 15. utrimque inclusive), deinde de causa habitus brutis & hominibus tantum communi, *doctrina* (a §. 16. huc usque); restat, ut dicamus de causa habitus hominibus propria *Institutione*.

§. 22. Habitus hominibus proprii sunt vel memoriae, vel inventionis, vel judicii; unde & didactica istorum habituum triplex, *mnemonica*, *topica*, *analytica*: possumus enim propositiones (quippe quae soli homini propriae sunt) memorare, facere, judicare. *Topica* autem & *analytica* una logicae voce comprehenduntur. Ex quo

pa-

patet logicam, & mnemonicam didacticas partes esse; quibus denique methodologia non immerito addetur. Mnemonica praestat materiam, Methodologia formam, Logica applicationem materiae ad formam.

§. 23. Mnemonicae fundamentum est res aliqua sensibilis, quae dicitur *nota*, cum re memoranda certa relatione juncta: quae est vel comparatio, similitudo nempe & dissimilitudo; vel connexio qualis est totius & partis, partis & compartis causae & effectus, signi & signati, unde verba inventa sunt; alioquin fuisset hominibus difficilissima, rerum meminisse: verba enim non tantum signa sunt cogitationis meae praesentis ad alios, sed & notae cogitationis meae praeteritae ad me ipsum, ut demonstravit *Tb. Hobbes* principio elementorum de Corpore. Ex notis autem illae maximae mnemonicae sunt, quae sensibilissimae, ut sic dicam (adde §. 14.); uti verba, quae non audiuntur tantum, sed & cum voluptate, v. g. carmina, termini, ut vulgo vocant, *clappantes*, quales conjunguntur, non sine magna discientium puerorum commoditate in nonnullis vocabulariis; item allusionem, quo artificio *Schickardus* in Horologio hebraico ad imprimendas discantibus radices, usus est & mirum est, quantum tota harmonia linguarum & vocum congruitas hanc rem juvet. Non tantum autem notae auditus, sed & multo magis notae visus ad memoriam pertinent. Huc pertinent hieroglyphica veterum Aegyptiorum, & ho.

hodiernorum Sinensium, de quibus multa *Kircheri Oedipus*; item dispositiones rerum per cellulas in obvia conclavis parte, & reliquae in certa loca distributiones, de quibus auctores mnemonici consulantur, in primis *Job. Henr. Alstedius* in *Thesouro Mnemonico*, & *Janus Caecilius Frey* in *Via ad Scientias & artes*; addanturque *VVinckelmannianae Historiarum Adumbrationes* per picturas, non utique spernendae.

§. 24. *Topicae seu Artis Inventivae* fundamentum sunt loci, id est, relationes transcendentes, ut totum, causa, materia, simile, &c. Et ex rebus tali aliqua relatione nexis fiunt propositiones per artem combinatoriam, ut fuse diximus in nostra de *Arte Combinatoria* dissertatione: nec contemnenda sunt, quae in hanc rem contulere *Raym. Lullius* in *Operibus Variis*, & *Job. Henr. Bisterfeldius* in *Epitome Artis meditandi*.

§. 25. *Analytica seu Artis Judicandi* mihi quidem videtur duabus fere regulis tota absolvi: 1) ut nulla vox admittatur nisi explicata: 2) ut nulla propositio, nisi probata. Quas arbitror longe absolutiores esse, quam quatuor illas *Cartesianas* in *Prima Philosophia*, quarum primaria est: quidquid clare distincteque percipio, illud est verum: quae infinitis modis fallit.

§. 26. *Methodologia seu ars disponendi* versatur circa methodum. Methodus autem est vel naturalis, cujus haec est regula: quidquid sine altero cognosci potest, non vero alterum sine ipso, illud

illud alteri praeponi debet: vel occasionalis, cujus nulla generalis regula tradi potest, sed variat infinitis modis. Quae de re plura differunt Jacobus Acontius in libro de Methodo, & epistola Stratagematis Satanae addita, & Job. Neldelius, & Abrahamus Calovius.

§. 27. Et hactenus de causis habitus tam generalissimis, actionum multitudine & magnitudine & generali jucunditate; quam specialibus, arte mnemonica, topica, analytica, methodologica. Sequitur habitus objectum, seu ipsa actio, cujus est habitus.

§. 28. Cujus ratione habitus est vel corporis, vel animi. Habitus corporis vel sunt circa actionem relinquentem, *ἀποτέλεσμα* (a), vel sunt facti transiensis. Artes opus relinquentes vel naturam promovere, applicando agens & patiens, & deinde cessando; uti agricultura, horticultura, ars pastoritia, antiquissima artium, ars item medica, chymica, veterinaria: vel suum solae peragunt, totumque opus exsequuntur, ut omnes illae, quae res tamdiu jungunt, separant, vel transformant, donec prodeat certa ipsis optata figura. In conjunctione consistit, v. g. ars pictoria, in separatione statuaria, in transformatione omnes quae rebus primum liquidis, deinde consistentibus certam formam imprimunt, ut metalli vel vitri fusoria, pistoria, typochysia: ut nunc non persequar infinitas pro objectorum varietate exhibitis artibus mixtas, quas fusius explicuit cl.

Erhard.

(a) *cf. Dionem.*

Erhardus Veigelius in Analyſi Euclidea. Interea certum eſt, omnes in applicatione agentis naturalis, vel conjunctione, vel ſeparatione, vel transformatione rerum, vel his inter ſe mixtis, conſiſtere.

§. 29. Artes facti tranſeuntis, ſeu opus non relinquentes, dicuntur vulgo exercitia; & conſiſtunt vel in promotione alterius, vel ſimpliciter in motione mei. In promotione conſiſtit ars navigandi, currum agitandi, equitandi, chartas pictas artificioſe miſcendi, teſſeras ita jaſtandi, ut, quod velis, cadat, ars jaculandi, parvae pilae vel majoris, ludus conorum, ludus tabulae betulinae, &c. Motio ſimpliciter eſt vel totius corporis, vel partis tantum. Totius corporis, ut in arte ſaltatoria, ſaliendi, currendi, funambularia; & ſi haec quoque addi poſſe videtur, ars volandi, cui proportionem reſpondet ars natandi. Partis certae motio pro partium variatione varia eſt, ut in oculis ars ſlendi quum velis; in lingua ars diſtincte eleganterque loquendi vel canendi, ars item diſcernendi ſapores vinorum aliarumque rerum; in gutture ars bibendi; & in ſtomacho (eſſi alioqui viſcerum internorum non datur ars) nonnullorum promptitudo hauſta, quum velint, reeffundendi: ita in labiis, ut alter ex eorum formatione, velut ſermone, me intelligat, de quo *Helmontius Junior* in edita nuper diſſertatione de Alphaneto Naturae. Taceo de nonnullorum artibus digitos, articuloſque, aut alia membra

C

. ſine

Singulari, aliis inconfueta, ratione flectendi; item de arte praestigiatoria, von der gauckel-sasche, quo pertinet & crumenifecarum celeritas. Ex eodem fonte est ars musica organica, quae vel immediate digitis aut pedibus, vel plectro aliquo mediante fit. Denique omnium inter se & cum re praesenti membrorum harmonia comparatur arte gestuum, de qua praeclare scripsit *Scipio Clavomontius*: quo pertinet ars histrionica, quae etsi olim contempta, hodie tamen etiam apud magnos viros non immerito in pretio habetur.

§. 30. Et hi sunt *habitus corporis*, etsi inter eos magnum discrimen observari debeat. Quamquam enim mediante corpore, omnes exercentur; nonnulli tamen habitus in ipso corpore, ut ita dicam, ita siti sunt, ut etsi animus omnes regulas pernoverit, artem tamen exercere non possit, nisi accedente corporis assuetudine: v. g. in ludo pilae, in saltando, in arte musica tam vocali quam organica, &c. Et hi *proprie* sunt *habitus corporis*. *Habitus* vero alii *proprie* sunt *in animo*, & corpus tantum distanti animo paret, nec ipsum quidquam artis contribuit; ut in artibus plerisque ἀπερίλιμνα (a) relinquentibus, & in ludo latrunculorum vel aggerario, aliisque in ingenio sitis, & in potestate artificis existentibus.

§. 31. *Habitus animi* nunc sequuntur. Omnis autem actio animi est cogitatio; nam & velle
nihil

(a) effectum.

nihil aliud est, quam cogitare rei bonitatem. Omnis porro cogitatio est alicujus propositionis: meri enim termini simplices, h. e. *facultates inferiores*, tantum apud bruta reperiuntur; hominis imaginatio numquam est sine aliqua reflexione.

§. 32. Propositio omnis est vel singularis, hinc *historia*; v. g. magnes in Mecha Arabiae sursum trahit localum ferreum Mahumedis (singamus enim exempli gratia hoc ita esse): vel universalis contingens ex inductione singularium pendens, hinc *observatio*; v. g. magnes trahit ferrum: vel universalis necessaria ex ipsis terminis demonstrabilis, hinc *scientia*; v. g. quidquid movetur, ab alio movetur; vel, si magnes trahit ferrum, necesse est corpora effluvia ex magnete in ferrum ire.

§. 33. *Historia* igitur est mater observationum, de cujus natura, constitutione, partitione egregie Fr. Baconius de Verulamio in tractatu incomparabili de Augmentis Scientiarum, nec minus praeclare in Novo suo Scientiarum Organo. Quia vero in eadem materia dantur *historiae*, *observationes*, & *theoremata*, ex quibus scientia conflatur; v. g. *historia*, Fabii Maximi, qui sub Caesare Augusto vixit, uxor fuit garrula, *observatio* seu *cbria*, mulieres sunt garrulae; *theoremata* seu *gnome*, garrulo nihil arcani committendum: ideo jam propositiones in universum, non ratione copulae & signi (ut §. 31.), sed ratione terminorum partiemur.

§. 34. *Termini* porro aut sunt *simplices*, aut *compositi*. *Simplices* sunt, qui sunt indeclarabiles per terminos notiores; quia immediate sensui obiiciuntur, ipsae nempe *qualitates sensibiles*. Quidquid autem habet qualitates sensibiles, seu quidquid est sensibile, h. e. *quidquid aut mente tantum, aut mediantibus organis corporeis percipitur* (ut infra §. 34.), illud dicitur *ens*. Et haec est perfectissima *entis* definitio: quoties enim probare volumus aliquid esse, probamus ex eo, quia nos, vel alii senserint, aut ipsummetensione immediata, aut saltem aliud, quod sine ipso esse non potest, quae est sensio mediata. Et qualitates simul sumtae, seu imaginabilitas, constituunt *essentiam*, sensibilitas *existentiam*: ex cogitatione autem plurium entium simul oriuntur *relationes*, seu *affectiones entis*; nam ex coimaginabilitate, seu coessentia oritur *comparatio*, huc idem, diversum, simile, dissimile, contrarium, genus, species, universale, singulare; ex consensibilitate, seu coexistentia oritur *connexio*, huc totum, pars, ordo, unum, plura, necessarium, contingens, connexum, causa, &c. Hinc fluit metaphysica universa.

§. 35. *Qualitates* porro *sensibiles* in specie, aliae *mente* tantum percipiuntur; aliae & *phantasia*, seu mediantibus organis corporeis. *Mente* percipiuntur duae tantum qualitates sensibiles, 1) *cogitatio*, 2) *causalitas*. *Cogitatio* est qualitas sensibilis intellectus humani, seu nescio cujus rei in nobis, quam animadvertimus, cogitare: *etiā*,

etfi, quid fit hoc ipsum cogitare, explicare non magis possimus, quam quid fit albedo, aut quid fit extensio (a). hanc cogitationem etiam Deo & Angelis inesse, demonstratione colligitur. Circa hanc igitur qualitatem sensibilem, quae dicitur cogitatio, versatur logica post metaphysicam nobilissima scientiarum ab *Aristotele* ad mathematicorum formam demonstrative tradita.

§. 36. Altera qualitas sola mente sensibilis est causalitas, quando ex effectu per demonstrationem colligitur; esse aliquam ejus causam, etsi latentem. Et haec qualitas, praecisis aliis qualitatibus, v. g. motu, figura, &c. inest causae Mundi, seu Deo; tum causis mirabilium quorundam factorum in Mundo, seu Angelis; & denique animo nostro, tamquam causae motus corporis etfi modum causandi explicare non possimus (b). Et haec est doctrina *pneumatica*, quae agit de entium incorporeorum actionibus ad extra, quemadmodum logica agit de eorum actione ad intra seu cogitatione: quo pertinet & Philosophia practica, seu doctrina de jucundo & utili & justo, seu eo quod communiter utile est. Hujus loci est demonstratio existentiae Dei, & attributorum ejus, Angelorum item, & mentis incorporeae in nobis, seu immortalitatis animae. In quibus rebus propriis meditationibus mirabili ratione ad mathematicam certitudinem pervenimus. Quod nos longe majoris aestimamus

C 3. ad

(a) Emenda ut in praefatione VVolfii.

(b) Emenda ut in praefatione VVolfii.

ad tranquillitatem mentis, & fiduciam aeternitatis, quam si vel perennem motum, vel quadraturam circuli invenissemus.

§. 37. *Qualitates organis corporeis sensibiles sunt vel communes pluribus organis, nempe numerus, qui omnibus sensibus externis percipitur, huc arithmetica; & extensio ejusque varii modi, quae visu solum & tactu percipitur, hinc geometria: porro quidquid, praeter extensionem & numerum, aliam adhuc qualitatem sensibilem habet, id dicitur corpus; quidquid non habet, dicitur vacuum: hinc jam oritur physica; sensus autem simplicissimus est tactus, quo percipitur motus: quae explicare, est generalis physicae; quia, ut deinde demonstrandum est, in ceteris qualitatibus nihil aliud est, quam subtilis motus; per quem, assumpta extensione, ceterae omnes explicari possunt. Vel sunt qualitates rationis speciales, soliditas, fluiditas, tenacitas, glabricies, &c. quarum, ut & lucis, colorumque, tum sonorum, odorum, saporum historia diligentissime colligenda est, ut tanto facilius causa per materiam & motum reddi possit.*

§. 38. *Philosophiam abstractam de qualitatibus sequitur concreta de rebus; in quas hae qualitates cojerunt: in qua nihil aliud fit, quam quod historicae rerum qualitates recensentur, & nihil denuo demonstratur, sed subsumtio tantum fit ex praedemonstratis in Philosophia abstracta. Hic agitur de Deo, Angelis, mente nostra, igne, vaporibus, meteoris, aqua, & speciebus liquo-*

rum

rum variis, terra, & speciebus variis terræ seu mineralibus, plantis, denique animalibus. Hic igitur non qualitarum connexio inter se, & cum subjectis, sed subjectorum connexio cum qualitatibus recensetur. Potest hæc philosophiæ pars dici *εἰδησιολογία* (a), quemadmodum præcedens *νοησιολογία* (b).

§. 39. Concludat denique *cosmographia*, in qua exponitur subjectorum connexio inter se, quomodo re vera in mundo disposita sunt: historia motuum caelestium sphaerica & theoretica astrognomia, observationesque recentiorum, breviter historia mundi universi, rerumque inde usque a creatione ejus memorabilium, quo perzinet chronologia, historia universalis, & certarum regionum, nationum, statuum, generum vitæ &c. Hac mea disciplinarum partitione certus sum omnia exhaustisse, ipsaque scientiarum elementa breviter, sed solide adumbrasse.

§. 40. Postquam (a §. 27. huc usque) de *discibilibus* diximus, excerpamus jam ex iis *discenda*, modumque *studiorum* summatim delineemus. Primum quod infanti discendum, est *lingua*. Hic detur opera, ut eadem celeritate per usum latinam, qua patriam imbibat; etsi opus non sit in nominibus simplicium, v. g. stirpium, animalium, &c. latinis nimis distineri; raro enim occurrunt. Hoc fiet, si certa diei parte, v. g. mane sit inter paedagogum & condiscipulos latine, a meridie inter ancillas & conjugem ver-

C. 4

nacu-

(a) *specierum descriptio.* (b) *qualitarum descriptio.*

macule loquentes. Hac arte Albericus Gentilis filium suum infantem tres linguas simul docuit: ipse cum eo loquebatur latine, conjux gallice, domestici anglice, quae ipsi vernacula erat lingua. Alterum hoc tempore studium sit *gestuum*. Veniat igitur quotidie inter homines moratos cultosque; ita facile spectando proficiet. Tertium sit *historiae*, tum universalis, tum in specie sacrae, & status mundi praesentis.

§. 41. Quum vero sextum annum attigerit, mittatur in ludum publicum; quae res conversationem, & tandem amicitias per vitam dumtaxat praebet: vivat parum apud parentes, ut discat ad propriam prudentiam refugere: assuescat exercitiis, arti musicae, saltatrici, gladiatoriae, jaculatoriae, pictoriae, aliisque in vita necessariis vel decoris; in primis vero elegantiae verborum: accedat vero & historiarum veterum specialior cognitio, & diligentissima matheos cura, arithmeticae scilicet, & geometriae, & opticae, & staticae; & astronomiae: addantur ex physica nomina tantum herbarum, mineralium, arborum, animalium, instrumentorum mechanicorum; quo pertinet *Comenii Orbis Sensualium Pictus*, sed diligentius pingendas, & coloribus convenientibus illustrandas: addatur exercitium stili, non litteris tantum, sed & sermone & quidem extemporaneo: ostendantur ei loci discurrendi, memorandi, inveniendi per artem combinatoriam.

§. 42. A duodecimo ad decimum octavum libere.


beralius tractetur, praeceptoribus non sublit, sed amicis: monstrantur ei naturae artisque arcana majora, fundamenta artium mechanicarum; ut ex iis saltem materiam, instrumenta, regulas principales, & pretia sciat; item rationem commerciorum per orbem; ut dignoscat inter merces, sciat pretia, loca unde veniunt: jam discat medicinae rudimenta, anatomiam, vires simplicium, rationes praeparandi pharmacopoeorum, & chymicorum; optandum enim quemlibet hominum esse aliquatenus medicum, immo jurisconsultum & theologum, scilicet ut elementa, & theologiam saltem jurisprudentiamque positivam, pernoscat: igitur sciat statuta suae Reipublicae & leges regni, sed & aliquo modo aliorum, ut possit tanto melius peregrinari: discat linguas gallicam & italicam, utque Scripturam ipsam audire possit hebraicae graecaeque tantum, ut intelligere ipsi verus novumque Testamentum liceat: declamet publice & in comœdias prodeat; nam, ut recte H. Græsius, rhetorica, aliarum artium coronis, nonnisi haustus plerisque disciplinis accedit: sit autem exercitium hoc non in latina solum, sed & vernacula; sed primario exerceatur in ea professione, in qua suas aliquando dotes explicaturus est: habeat quoque & librorum cognitionem, quae mirum quantum & ornamenti & utilitatis praestet: vivat hoc tempore non in schola, sed academia vel aula, & aliqui loco celebri, in quo in magnorum virorum notitiam familiari-

tatem-

catemque venire liceat, quod est fundamentum hodie promotionis; neque enim amplius facile quisquam ex academiis ad officia vocatur. Olim mos erat scribere ad Universitatem, & egregii alicujus juvenis denominationem ab ea petere; hodie aliis artibus emergendum: Unde non decet, academias esse in locis minutis & obscuris.

§. 43. Tempus omne vero a decimo octavo anno, vel, si tardius ingenium sit, viceſimo usque ad promotionem, peregrinationi tribuatur, in qua curet valetudinem. Quo pertinet Medici Augustani, cujus nomen non succurrit, elegans tractatus de Medicina Peregrinantium: observet notetque commoditates in cibo, potu, aedificiis, vestibus, agricultura, mechanicis, quas apud aliquem populum invenit: observet, & leges, & consuetudines singulares: ambiat notitiam magnorum virorum, quae peregrinis magis quam domesticis patet, in primis secretariorum & ministrorum status: si quas etiam memorabiles historias, si qua singularia naturae & artis audit, diligenter notet. Ita obtinebitur finis peregrinationum, ut a regione ad regionem non solum mercimonia, sed & artes deportentur: in primis vero, si regio aliqua in certis manufacturis excellit, det operam, ut artes eorum expilcentur. Plura non est hujus loci dicere: summi viri praeoccuparunt. Haec sunt, quae de *ratione studiorum* in universum ex veteribus nostris dudumque conceptis meditationibus, inter diversoria, sine libris, in char-

chartam coniicere deproperavimus; unde nec licuit multarum allegationum pompa margines stipare. Si non pervulgata nec inutilia attulimus, & exscriptorum & novatorum crimen efugiemus.



THE
JOURNAL
OF
THE
ROYAL
ANTHROPOLOGICAL
INSTITUTE
OF GREAT
BRITAIN
AND IRELAND
VOLUME
LXXV
PART I
1905

1905

P A R S II.

SPECIALIS, AD SOLAM JURISPRUDENTIAM RESTRICTA.



§. 1. **J**urisprudencia est scientia juris, proposito aliquo casu seu facto: cujus tradendae methodum quomodo moliamur, necesse est ut duo agamus: 1) in idea delineemus *jurisconsultum perfectum*, & quidquid ad ejus consummationem pertinet; quemadmodum Cicero fecit in libris de Oratore: 2) *vias* designemus ad perfectionem grassandi, aut sicubi placeret, in secundis tertiisque consistendi; quemadmodum Plato in libris de Republica ideam, in Dialogis vero de Legibus quod assequi cuique liceret, exposuit.

§. 2. Quidquid ad *jurisconsulti perfecti* eruditionem pertinet dividi potest ad instar theologiae in partem *didacticam* seu *positivam*, ea continentem, quae in libris authenticis expressae extant, & certi juris sunt, *historicam*, originem, auctores, mutationes, abrogationesque legum enarrantem; *exegeticam*, ipsos libros authenticos interpretantem & denique apicem ceterarum; *polemicam* seu *controversariam*, casus in legibus indecisos, ex ratione & similitudine definientem.

§. 3.

§. 3. Ex his *didactica* & *polemica* propriè sunt partes Jurisprudentiae, *historica* vero & *exegetica* sunt requisita tantum; haec *theorica*, illa *practica*: Jurisconsultus enim, qua talis, satis habet, si sciat quid in proposito casu sit juris, quod potest etiam mere pragmaticus assequi, immo qui ne latina quidem novit, sed difficulter immo inutiliter: nam si quis negare audeat, non poterit ex historia legibusque demonstrare; ideo *empirici* magis nomen merebitur, quam ejus qui veram in jure Philosophiam sit assecutus.

§. 4. Merito autem partitionis nostrae exemplum a Theologia ad Jurisprudentiam transtulimus, quia mira est utriusque facultatis similitudo: utraque enim duplex principium habet, partim rationem, hinc theologia jurisprudentiaque naturalis, quarum illam *Raymundus de Sabunde* & *Theophilus Raynaudus*, hanc vero *Grotius*, *Hobbes*, ceterique excoluere, quorum infra (§. 70.) mentio fiet; partim scripturam seu librum quemdam authenticum leges positivas, illic divinas, hic humanas, continentem. Male vero nonnulli huic comparationi medicinam quoque, philosophiam, ac mathesin miscuere: nam Hippocrates, Galenus, & Aristoteles erroris saepe convicti sunt; Euclidi non creditur quia dicit, sed quia probat, quod secus est in legibus divinis, humanisque (a)

§. 5. Nec mirum est, quod in Jurisprudentia
idem

(a) Emenda ut in praefatione VVolfi.

idem & in Theologia usu venire; quia Theologia species quaedam est jurisprudentiae universim sumtae: agit enim de jure & legibus obtinentibus in Republica, aut potius regno Dei super homines, moralis de jure privato, reliqua de jure publico: nam, ut nostrammet de Arte Combinatoria commentationem (p. 29.) aliquantisper exscribamus, infideles quasi rebelles sunt, Ecclesia velut subditi fideles, personae ecclesiasticae immo & Magistratus politicus, velut ministri & Magistratus subordinati, excommunicatio velut bannus, doctrina de Scriptura sacra & verbo Dei, velut de legibus & earum interpretatione, de canone librorum sacrorum, velut de legum authentica, de erroribus fundamentalibus, quasi de delictis capitalibus. Quoties testamenti, quoties hereditatis, quoties servitutis, quoties adoptionis apud D. Paulum mentio est? In explicatione testamenti magna pars controversiae de cena inter augustanae confessionis, ac reformatos theologos consumitur. *Faustus* profecto *Socinus*, quia a jurisprudentia ad Theologiam venit, mirum quantum ceteris omnibus facessiverit negotii. *Socini* vero discipuli quae latibula sub juridica acceptilationis voce quaerant, recensuit cl. *Zimmermannus* peculiari dissertatione. Utrum & quatenus in rebus fidei obtineat praescriptio, nuper nobile par *Fratrū Valenburiensium* disseruit: aliorum iuverat cl. *Hulsemannus*, Augustanae confessionis theologus, peculiari itidem tractatu de praescri-

scri-

scriptione. Breviter, tanta in Theologia juridicarum controversiarum seges est, ut inter ^{edita} (a) egregii *Dorschei* postumum opus jurisprudentiae theologiae titulo restet.

§. 6. *Jurisprudentia didactica*, *elementorum* nomine non inepte appellabitur ad imitationem *Elementorum Euclidis*, quem in titulis suorum librorum *Tb. Hobbes* *Elementis de Cive & Corpore*, ac *Job. a Felde*, & *Sam. Pufendorf* *Elementis Jurisprudentiae* secuti sunt. *Elementa* duobus absolvuntur, explicatione terminorum seu *definitionibus*, quibus respondet titulus de *Verborum Significatione*; & propositionibus seu *praeceptis*, quo pertinet titulus de *Regulis Juris*.

§. 7. *Definitiones* seu explicationes terminorum juridicorum peculiari libello tradendae sunt, nullis admixtis praeceptis seu regulis: hic possit appellari *Partitiones Juris*. *Methodus* ejus non sit alphabetica, sed accurata & solida; mirum enim, quam in methodo solida, & naturali res rem explicet, & memoria juvetur: quam in rem commodissimae sunt tabellae, quarum opem licet uno obtutu primum in generali tabula totam scientiae velut geographicam mappam, deinde vero speciatim singulas quasi provincias lustrare. Hae veteribus incognitae a *Petro Ramo* ejusque discipulis primum celebratae sunt: magnam quoque in illis diligentiam posuit *Theodorus Zuvingerus* in ethicis politicisque, & in jure *Job. Tb. Freigius*: hos innumerabilium aliorum

ca.

(a) non edita.

caterva secuta est, sed vix affecta, quod optamus, methodum, inquam, naturalem: nam, ut recte *Petro Ramo* ramissisque objecit incomparabilis *Verulamius*, effecere illi anxietate dichotomiarum, ut rem coangustarent magis, quam comprehenderent; quae interea velut anguilla elabebatur, aut pro grano proprietatum inutiles divisionum paleas relinquebat.

§. 8. Quum vero docendae jurisprudentiae *methodus* comprehendat & *methodum disponendae*; videamus quas varii vias iniverint: juris enim in artem redigendi vetus admodum cura est, quam & *Cicero*, olim *Gellio* teste, agitavit; deinde in eandem curam incubuere iurisperiti veteres; neque enim tantum confusos quaestionum & responsionum libros, sed & *Digesta* vel ipso nominis indicio ordinata, & *Institutiones* confecero. Sed quia eorum scripta & mutilata & discerpta sunt, licet tantum ex inscriptionibus Legum Justinianearum nonnulla divinare. *Tribonianus* aliam in *Institutis*, aliam in *Digestis* & *Codice* methodum tenuit: illic enim tria juris objecta constituit, *personas, res, & actiones*, ut *personarum* capite explicuit potestatem patriam, dominicam, nuptias, tutelam, curam, omnem nempe potestatem in ipsas immediate personas sine rerum interventu. Alterum caput est quoties *res* interveniunt: & vel principaliter, ut non certa persona proprie teneatur, sed certa res, ubicumque inveniri possit, quod est *jus in re*; aut inter vivos, hinc.

D

domi-

dominium, servitus, ususfructus, usus, habitatio, aut ex successione, hic hereditas ab intestato vel ex testamento, legatum, fideicommissum, &c.: vel *res* interveniunt minus principaliter, ita ut teneatur certa persona, non vero certa res: tum dicitur *jus ad rem*. *Jus ad rem* est vel ex contractu, vel quasi; vel ex delicto, vel quasi. Ad tertium caput *actionum* pertinet & exceptiones, replicationes, totusque processus, & denique Judicis officium. In Digesti vero ac Codice meras solasque *actiones* ordine Edicti Perpetui *Tribonianus* recensuit, quum duobus prope titulis tantum de *personis rebusque* quiddam praelibasset.

§. 9. Jurisconsulti medii aevi numquam ipsi de arte juris vel per somnium cogitarunt, satis habentes si Leges glossis, Judices consiliis obruerent. Quemadmodum igitur theologi illorum temporum ad Sententias & Thomam, philosophi ad Summulas & Aristotelem; ita ipsi ad Juris Corpus sua allinebant. Quin immo videntur pro certo habuisse, methodo legum semper esse utendum, quasi eae & in logicam exercerent imperium; idque & cultissimo hoc aevo nonnullis insignibus viris placuit *Aegidius Mommerius* in dissertatione de Studio Juris negat alios haberi debere locos communes, quam leges, aliam methodum, quam legum, solas illas in numerato habendas, cetera negligenda: *Meierus* quoque, collegii argentoratensis director, in praefatione oblique illis irascitur, qui suam methodum
au-

audent imperatoriae praeferre: & *Antonius Matthaei* in Collegio Fundamentorum Juris ex professo disputat novam juris methodum inutiliter, immo damnose hoc rerum statu concipi; fateri sese Justinianeam optimam non esse, sed quid si, inquit, nec tua sit? fateri, optandum, ut aliud publica auctoritate juris corpus exstet; nunc vero quamdiu ad hoc recurrendum sit, novae methodi commento laborem in duplum crescere, quia praeter Justinianeam nova quoque methodus memoriae imprimi debeat.

§. 10. Sed nos contra methodi Justinianae vitia novae utilitatem explicabimus. Primum in ipsa methodo Justiniana labor crescit in duplum, dum alia est Institutionum, alia Digestorum, Codicisque methodus. Institutionum methodus per *personas, res: & actiones* primum superflua est: actiones enim tam ex jure personarum, quam rerum descendunt; & ipsae personae, v. g. servi & filii familias, habentur pro rebus, datur enim non minus servi quam equi vindicatio; & in filios familias etiam est dominium, sed certis a Republica modis restrictum: & ut breviter dicam, est haec methodus non ex juris, sed facti visceribus sumpta; personae enim & res sunt facti, potestas & obligatio &c. juris termini: & si semel methodum facti eligere voluit, cur non continuavit, cur non subdivisit personas, & res ex physicis & ethicis v. g. personas in surdos, mutos, caecos, hermaphroditos, perfectos, viros, feminas, im-

puberes, minores, adultos, divites, pauperes, nobiles, magistratus, rusticos, peregrinos, haereticos, schismaticos, &c; res in dividuas, individuas, pretiosas, viles, mobiles, immobiles semoventes, thesauros, nummos, res fungibiles, quadrupedes, equos, feras, &c; cur, inquam, non ita titulos juris distribuit, & in singulis quid juris esset, explicuit? Agnovit scilicet hac ratione secururas infinitas repetitiones, nec posse rem ad universalia redigi. Perinde ac si geodaeta non formae, sed materiae ratione doctrinam suam partiretur, & ageret de dimensione agrorum, pascuorum, camporum arenosorum, argilosorum, saxosorum; quis non hunc novum Euclidem rideret? Ita igitur Jurisprudentiae divisio a concreto sumpta omnis confusionis principium est, & ad eos potius pertinet, qui vel tractatus vel indices scribunt: hi possunt ex variis titulis colligere jura seminarum, mutorum, surdorum, &c. Illud quoque negari non potest, methodum legum hodierno aevo plane non esse accommodatam: nullibi jura ecclesiastica, nullibi feudalialia, nullibi materia concursus creditorum commode inferitur. In Digestis certe & Codice perpetua ordinis causa est veteris juris ratio, quae tantum ad hodiernam, quantum sus ad Minervam.

§. 11. Methodus vero nova incredibilia comoda afferet, si accurata erit: ita enim primum mirabile orietur compendium discendorum, dum generalibus regulis infinitae speciales simul discen-

centur, & praemissis generibus gradatim descendetur ad species, dicenturque ea tantum, quae nuda generalium subsumptione non constant; nam ut recte animadvertit *Feldenus* in praefatione, Elementorum, quid opus est specialiter inculcare, minorem indigere curatore, alio loco furiosum, alio absentem, quum generalis regula sit ex ipsis politicae principiis manifesta, qui negotiis suis ipse praesse non possit, eum indigere curatore? Deinde memoria ipsa illa naturalissima rerum ex se fluentium connexionem summo pere juvabitur, si nempe ex terminis in generis definitione positis, seu ex ipsa generis differentia, sumantur differentiae specierum sibi contradistinctae. Denique quum accurata methodus non esse possit sine accuratis terminorum definitionibus; definitio enim generis velut clavis est differentiarum species constituentium; imbibetur eadem opera solida juris cognitio, & via patebit per rationes universales casus in jure indecisos determinandi: ut ita tam memoriam quam judicium appareat a methodi perfectione pendere.

§. 12. *Antonii Matthaei* emplastrum causae desperatae non medebuntur. Fatetur Tribonianus methodi lapsus; ergo fatebitur optandam meliorem; breviter, novum juris corpus. Quid igitur methodus averfatur, si nihil aliud saltem novi corporis *εκκρυψαία* (a)? Quod de duplicato labore arguatur, nihil est; nam methodum na-

D 3

turae

(a) *adumbrata descriptio.*

turalem discere, non est labor; immo dum rerum accuratae definitiones percipiuntur, eadem opera methodus perfecta aliud agendo hauritur. Erit vero illa velut index corporis Justiniani. decebitque ad marginem loca Legum correspondentia allegari.

§. 13. Methodum juris varii varie iniere. Omnes non persequar, non *Corsium*, aut *Matth. Stephani* dissert. de Arte Juris, non *Hug. Donelli* in Com. methodum, non *Chopium* de Vera Philosophia Juris, non *Hopperi* Seduardum, non *Martini Del Rio* Principia, non illum *Sulsbaci*, cura junioris *Helmontii*, nuper latine germaniceque recusum *Octavii Pisani* egregium *Lycurgum*, non quae *Feldenus*, aut *Pufendorfferus*. aut *Rich. Zucchaeus* laudabiliter tentavere, non *Grotii* ordinem, cl. *Thomasii* iudicio si non optimum, certe nec pessimum; facilius enim carpere quam emendare: saltem de *Theod. Althusio* & *Herm. Vultei*o admonebimus, quorum ille in *Dicaeologia*, hic in *Jurisprudencia Romana* jus in artem redigere non verbis solum, sed facto tentavit. Verum uterque, quod in methodo *Triboniana* desiderabam, factum juri miscuit: nam *Althusii* prima haec statim divisio est, *Jurisprudentiam* esse duplicem, aliam de facto, aliam de jure; quasi vero *jurisprudentiae* sit de facto agere, aut quasi detur *jurisprudentiae* species, quae de jure non agat: *Vultei*us vero inter alia in eo displicet, quod obligationem referat ad jus personarum, tanquam contradistinctum juri rerum,

rerum; quum tamen, ut infra ostendemus, in ipso jure rerum intercedat personae possidentis obligatio ex facto ejus, tamquam quasi contractu, possessione nempe, orta, qua tenetur ad restituendum. Cetera particularius non persequemur.

§. 14. Sed quia de aliis iudicium nobis sumpsimus, eandem in nos potestatem publicatione nostrarum meditationum faciemus. Demus igitur operam, ut solidam methodum ex ipsis rerum definitionibus eruamus. *Jurisprudentia* est *scientia actionum, quatenus justae, vel injustae dicuntur: justum autem atque injustum est, quidquid publice utile vel damnosum est: publice, id est, primum mundo, seu rectori ejus Deo, deinde generi humano, denique Reipublicae, hac subordinatione, ut in casu pugnantis voluntas seu utilitas Dei, si ita loqui licet, praeferatur utilitati generis humani, & haec utilitati Reipublicae, & haec propriae: hinc Jurisprudentia divina, humana, civilis. De propria autem utilitate dicere, non jurisprudentiae, sed politicae est.*

§. 15. *Moralitas* autem, seu *justitia* vel *injustitia actionis* oritur ex qualitate personae agentis in ordine ad actionem, ex actionibus praecedentibus orta, quae dicitur *qualitas moralis*. Ut autem qualitas realis in ordine ad actionem duplex est, potentia agendi, & necessitas agendi; ita potentia moralis dicitur *jus*, necessitas moralis dicitur *obligatio*.

§. 16. *Subiectum qualitatis moralis est persona & res. Persona* est substantia rationalis, ea-que vel *naturalis* vel *civilis*: *Naturalis* Deus Angelus, homo: sed Deus est subiectum juris summi in omnia, nullius vero obligationis. *Persona Civilis* est collegium, quod, quia habet unam voluntatem certo signo dignoscibilem, v. g. ex pluralitate votorum, sorte, &c. ideo obligare & obligari potest. *Res* quoque subiectum juris est & obligationis: v. g. si officio aliquid legatur, jus erit apud omnes successores: si quis in officio existens, qua talis est, alicui damnum det, ipsum officium tenebitur, transibitque in successores obligatio: ita si equo aliquid legatur, v. g. phalerae, dubitandum non est, ad dominum equi, alienato equo, rem transire: idem de servo juris est, qui ipse non pro persona habendus, sed re. In omni vero jure reali res est subiectum obligationis. Porro ad subiectum pertinet tota *successionum* materia; quia successio est motus juris vel obligationis de subiecto in subiectum. Tractandum & hic de iis, quae pluribus communia sunt.

§. 17. *Obiectum juris & obligationis est corpus subiecti, res, persona tertii; jus in corpus meum tamquam subiecti, dicitur libertas. Jus in rem dicitur facultas, & habet species, dominium directum in rei materiam, utile seu jus utendi fruendi in formam, jus servitutis in partes formae seu qualitates, jus detinendi, usucapiendi conditionem, & alia jura realia. Jus in personam*

sonam dicitur *potestas*, & multis modis variat. interdum vitae & necis, interdum castigationis, interdum increpationis, &c. *Obligatio* est ne alterius *libertas*, *facultas*, *potestasque* impediat: quae impeditio dicitur *injuria*. Et *obligatio*, ne *potestas* alterius in me impediat, est *positiva*, qua teneor aliquid facere vel pati; & dicitur κατ' ἐξοχήν (a) *obligatio*: ceterae *obligationes*, ne alterius *libertatem* impediam, vel arripiam rem, sunt magis *privativae*. *Objectum* porro *juris mei* est quidquid mea interest, idque vel ipsummet, vel aequipollens seu aestimatio; quo pertinent *pretia* rerum.

§. 18. *Causa qualitatis moralis* est *natura* & *actio*. *Natura* est *causa libertatis* & *facultatis*, & correspondentis in alio obligationis de non impediendo. *Actio* est *causa potestatis* in persona agente ad aliquid faciendum, vel in seipsa aut rebus suis patiendum; estque vel *possessio*, vel *injuria*, vel *conventio*. *Possessio* tribuit *jus reale* primum in corpus meum, quia hoc ante omnia possideo, hinc *libertas*; deinde in res alias, quae sunt nullius, hinc *facultas*: unde mihi *jus* oritur rem meam, ubi invenio, vindicandi; & alteri *obligatio* hoc non impediendi. *Injuria* in statu mere naturali dat laeso *jus libertatis*, *facultatis*, *potestatisque* omnimodae, seu *jus belli* in laedentem societatis ruptorem. Sed, in rebus publicis, immo & aequitate duce, ita restricta est haec licentia, ut aestimatione debeat esse

(a) *per excellentiam*.

esse contentus, reservata Reipublicae poena, si damnum consulto datum est: *Injuria* igitur fons est delictorum & quasi delictorum; *conventio* vero promissiones, acceptationesque omnes in se continet; quo pertinet doctrina de verborum interpretatione, conditionibus, &c. quasi contractus vero ad jus reale pertinent. Multa vero, quae ex his naturae fontibus non videntur descendere, sed ex lege, illa omnia eo ipso ex eorum uno, nempe ex conventionem descendunt, quia populus in legislatorem compromisit.

§. 19. Quare & omnes obligationes publicorum judiciorum, sive ad poenam corporalem sive pecuniariam tendant, pertinent ad *paſſorum* fontem: promisit enim quilibet subditus Reipublicae, se decreta ejus vel universalia, ut *Leges*; vel singularia, ut *ſententias*, rata habiturum. Decrevit autem Lex, ut qui hoc faciat, illud persolvat: ex ipso igitur *paſſo* promissae fidelitatis tenetur. Ita patet, ad hunc locum reduci *die policey-ordnungen*, ordinationes nempe politicas, quibus vita, conversatio, sumptus vestitium, conviviorum, omnes denique subditorum actiones formantur; nec minus *criminalia*, quae circa majora, pacem nempe publicam, securitatem civium, honoremque Dei & magistratus occupantur. Ex eodem *paſſorum* fonte est *jus publicum*, & ipse denique processus tam civilis quam criminalis; cujus finis est executio, quae est realis actio qualitatum moralium, seu ut qui habet potestatem vel necessitatem moralem, habeat & naturalem.

§. 20.

§. 20. Ita igitur *universi juris summa capita* deduximus: nam modi acquirendi juris sunt 1) *natura*, libertatis nempe & facultatis in res nullius agendi (§. 17.): 2) *successio* (§. 15.), quae non producit novum jus, sed vetus transfert: succedunt autem ab intestato mero jure soli descendentes in stirpes, sed ita in ea tantum bona, quae parentis erant, quum nascerentur, quia per traducem a parentibus orti sunt; ceterorum successio ab intestato pertinet ad fontem pactorum, quia ex lege descendit: testamenta vero mero jure nullius essent momenti, nisi anima esset immortalis (a): sed quia mortui revera adhuc vivunt, ideo manent domini rerum, quos vero heredes reliquerunt, concipiendi sunt ut procuratores in rem suam. 3) Tertius acquirendi juris modus est *possessio rei nullius* animo in posterum quoque possidendi; ex quo jus in posterum quoque possidendi tractandique oritur quod est reale: 4) *conventio*, velut traditio incorporalis, per signa rei aequipollentia, seu verba; quo pertinet, quidquid ex jure civili seu lege descendit, ut criminalia & processus: potest tamen *conventio* reduci non solum ad *possessionem* sed & ad *injuriam*; quia fallere est damnum animo dare: 5) *injuria*, velut ruptio societatis humanae in statu mere naturali omne jus mutuo tollens, immo alteri in alterum resque ejus jus absolutum tribuens; quod tamen in Republica legibus est restrictum.

§. 21.

(a) *Elementa, ut in praefatione Volfii.*

§. 21. Causae autem juris in uno, sunt modi amittendi juris in alio, seu acquirendae obligationis; modi autem amittendae obligationis, sunt causae recuperandi juris, seu liberationis: qualis est 1) *mors sine heredibus*, 2) *solutio* quo reducitur compensatio, & 3) *conventio* quo iterum reducitur lex. Ita igitur arbitror, summa juris capita ex meri juris evidentissimis principiis a me satis digesta esse; neque enim alia juris obligationisque causa, aut contrarium seu destructivum reperiri potest, quod in his non contineatur: specialius rem deducere, peculiari operae debetur. Haec autem, quae de methodo disponendi juris diximus, merito hoc loco praemittenda erant; quia non solum iurisprudentiae *didactica*, sed & *polemica* accurata hac methodo disponi debet.

§. 22. Nec omittenda hoc loco, quae de iurisprudentiae *polemicae* inclusione in pomoeria *didacticae* magni viri consulere; si exstantiores controversiae publica auctoritate decendantur, formeturque novum juris corpus accurate dispositum: quam in rem illustrissimi *Baconi*, tum in *Sermonibus Fidelibus*, tum in *Augmentis Scientiarum*, praeclarae meditationes exstiterunt. Mihi breviter videtur, tria in novo corpore requirenda; ut scilicet conscriptum sit *plene*, *breviter*, *ordinate*: ita aberit repetitio, obscuritas, contradictio.

§. 23. Tempus est, ut ad nostra *juris elementa* redeamus. Haec supra (§. 7.) divisa sunt in *defini-*

fnitiones & praecepta. *Definitiones* includi possunt libro, qui ob formam appellari potest *Partitiones Juris*; quo nomine & cl. vir, Dn. *Job. Otto Thabor* suum aliquem laborem insignivit. In eo declarentur termini usitatiores, eorumque definitiones, & divisiones explicentur methodo, quam dixi: omittantur vero curiositates philologicae, synonymiae: aequivocationes vero, sed insignes, & quae confusionis principium esse possint, non quaelibet obviae colligantur, significatioque famosior eligatur. Interea cl. *Rebbanii Hodegeta Juris* poterit non inutiliter legi, qui in vocabulorum explicatione in primis operam posuit. Causae vero, contraria, effectus, objecta, subjecta, non pertinent ad *definitiones* seu terminorum explicationes, sed ad *regulas* seu *praecepta*.

§. 24. *Praeceptorum jurisprudentiae* videamus *materiam, & Formam.* *Materiae* ratione inferantur ea tantum, quae in legibus expresse existant, & certi minimeque controversi juris sunt item ea tantum, quae adhuc in usu versantur, minimeque abrogata sunt; ab hodierno enim jure tyroni incipiendum esse infra ostendemus: omittantur item ea omnia, quae ex ipso jure naturae & sanae rationis principiis ita constant, ut rusticus perceptis terminis (quos propterea praemisimus in *definitionibus*) agniturus sit; nam tota fere conventionum doctrina ex jure naturae fuit, sed haereditates, processus, & criminalia positivis scatent: omittantur denique, quae non
tam

tam sunt quaestiones juridicae, quam vel historicae, v. g. cur Justinianus dicatur Alemannicus Franciscus; vel philologicae, v. g. an testamentum recte derivatum sit a testatione mentis; vel philosophicae, v. g. rectene Justinianus definierit iter, actum, viam, an mutuum sit alienatio: ponantur ea tantum, quae decidunt, quid, propositio aliquo facto, sit juris. Omissis igitur his omnibus, nempe 1) *incertis*, 2) *abrogatis* 3) *manifestis*, 4) *alienis*, mira erit hujus elementorum libelli brevitatis facilitasque.

§. 25. *Forma praeceptorum* consistit tum in dispositione *titulorum*, tum *subtitulorum*. *Titulorum* dispositio primum ea sit, quae *definitionum*; unde non erit incommodum, si *praecepta definitionibus*, aliis saltem typis, interserantur: deinde observetur in primis, ut, quantum fieri potest, abstrahantur universalialia: sunt enim *praecepta* primum *generalissima*, quae dicuntur *brocardica*, & haec a variis materiis etiam toto genere diversis abstrahunt, v. g. *omnis modus amittendi juris est voluntarius*, seu *nemini jus suum invito auferri potest*. Haec regula tam est universalis, ut nullam penitus patiatur exceptionem. Cur igitur, inquires, vulgo excipiunt, *nisi poenae loco a superiore*? Sed ideo illi hoc excipiunt, quia moralium principia non penetrarunt: nam quod a superiore auferitur, volenti auferitur; quia in superioris actiones ratas habendas jam olim consensus est (a). Sed datur
tamen

(a) *Grot. de jur. b. & p. l. 2. c. 21. §. 12.*

tamen superior, inquit, in quem consensum non est, v. g. Deus jure creationis: is igitur Aegyptiis penitus invitis jus suum abstulit. Sed sciendum, in comparatione ad Deum nullum dari jus, ideo nec juris ablationem. Mors proprie non est amissio juris, quia ipsa persona amittitur; nec solutio (invito enim solvi potest) non magis, quam usus fructus perit consolidatione: nuditas juris perit, non jus; jus potius perficitur. Possem aliis infinitis exemplis ostendere, quoties *brocardica* ejusmodi multis exceptionum spinis sine necessitate muniantur. Interdum vero formantur *brocardica* quaedam, plurimas exceptiones necessario habentia: sed talia ego inepta judico; quoties enim regula in uno vitiatur, perdit officium suum: officium enim regulae, tranquillare animum, ut certus sit in omnibus speciebus subjecti praedicatum obtinere: quod si regulae habent exceptiones, frustraneae sunt; quia fidi illis non potest. Quod igitur vulgo jaetatum est, *nullam regulam esse sine exceptione*, mihi perinde esse videtur ac illud, *nunc ego mentior*, vel illud scepticorum, *nihil scitur, ne hoc quidem, quod nihil scitur*, qualia nos collegimus in Specim. Quaest. Philos. ex Jure, quaest. 12.: nam haec regula seipsam simul probat & improbat. Quia enim nulla regula sine exceptione, & hoc ipsum axioma est regula; ideo ipsum quoque non erit sine exceptione; ergo aliqua regula sine exceptione; quia igitur nulla regula sine exceptione est;

est; ideo falsum, nullam regulam sine exceptione esse. Sed hoc obiter. Interea pro certo habendum, ignaviae ignorantiaeque in dictorio isto latibulum esse: nam & in grammaticis (unde ortum habet) olim *Sanctius*, postea *Scioppius* regulas tales exhibuere, quarum non datur exceptio; sed quidquid vulgo pro exceptionibus habitum est, aut ellipsis est, aut pleonasmus alicujus vocabuli. Idem vitium & in philosophicis vulgo regulis regnat, unde & in iuridicis manavit: nam ut cl. vir. *Job. Adamus Scherzerus* in Manualis Philosophici praefatione monuit, dicta quaedam inter regulas reposita sunt, quae plures habent limitationes, quam exempla; v. g. *qualis causa, talis effectus*: quod ubi multis distinctionum saepibus defendere conati sunt, tandem tamen huc recurrunt, scilicet in causis univocis. Quid autem est causa univoca? Ea nempe, ubi qualis causa, talis effectus est. Regula igitur sic concipienda erit: *ubi qualis causa, talis effectus, ibi qualis causa, talis effectus*:

Speclatum admissi, risum teneatis, amici?
 Quare regularum philosophicarum accuratam explicationem non inutiliter molitur clariss. *Thomasius*, &, uti spero, propediem publico donabit: nos quoque, si Deus vires dederit, reformationem *brocardicorum* quam primum concipiemus, redigentes ad perfectam universalitatem omnia, &, quae hoc non patientur, tamquam inepta reiicientes. Interea illas limitatio-

nes

nes non est opus regulae allinere, quae ex aliis regulis in eodem libro traditis, aut tradendis, per combinationem sumuntur: v. g. *qui promissit, praestet; nisi praestiterit, nisi liberatio ei legata sit, nisi compensare possit, &c.* Quid haec addere opus est? Per se ex regulis postea tradendis constant, & coacervantur hac ratione tantum inutiles repetitiones & grandes libri. His malis haecenus occursum non est; ideo nescio, quem in primis regularum juridicarum auctorem commendem: laudantur tamen *Barbosa & Diaz*, ut eos praeteream, qui regulas juris grandibus in folio lexicis complecti voluerunt.

§. 26. Et haec de *praeceptis generalissimis seu brocardicis*. Sequuntur *intermedia* ad certas materias restricta, nondum tamen specialissima; v. g. *cuicumque debetur reverentia, ille non est in jus vocandus*, v. g. *Parens, Patronus, Magistratus coercendi jus habens, &c.* Idque demonstratur ex natura vocationis in jus, quae fit per vim; obtorto enim collo nolentes trahebantur: cuicumque autem debetur reverentia, ille non est violandus. Quod est principium ex mero jure naturae vel rusticis constans. Danda igitur opera est, ut, ubicumque fieri potest, regulae generales concipiantur ad compendium discendi: immo tentetur, an concipi possit regula aliqua habens gradum necessitatis, qui dicitur καθόλου πρῶτον (a) ab Aristotele, seu *reciproca*, ut subje-

E

ctum

(a) in genere primum.

Etum aequale sit praedicato, nec possit subjectum generalius ad hoc praedicatum reperiri. Quo pertinent ea, quae in Arte nostra Combinatoria meditati sumus: v. g. *omnis & solus, qui res alienas in potestate habet, tenetur ad inventarium, aut juratam specificationem; & contra, qui tenetur ad talem certam specificationem, ille res alienas in potestate habet*: nam & heres hereditatem, quae solvendo non est, resignaturus, ad ejusmodi specificationem tenetur, quia ex postfacto apparet aliena possedisse. Similiter in materia torturae hanc mihi generalem regulam concipio, *omnis & solus qui condemnaretur rebus sic stantibus, si causa esset civilis, ille in causa criminali est torquendus*; quia in causa criminali nemo condemnatur, nisi confessus: ad confessionem igitur cogendus est, qui criminis convictus est. Unde ille etiam torqueri debet, qui exceptionem suam probare non potest, *sondern er musz sie auf der tortur erhalten*, quia qui in civilibus exceptionem probare non potest, condemnatur. Haec una regula est instar multarum, quae de indiciis ad torturam sufficientibus vulgo exstant. Ita in plerisque materiis res ad talem propositionem reciprocam reduci posset: qua de re multa admonuit cl. *Feldenus* tum in Notis ad Hugonem Grotium, tum in Elementis Jurisprudentiae. Et haec de *praeceptis intermediis*. *Specialissima* vero ut plurimum juris positivi sunt, & in solemnitatibus consistunt; suntque, generalibus demptis, admodum pauca: saepe

pe

pe enim una regula, aut altera totus aliquis titulus absolvetur. Specimen hujus rei, Deo juvante, daturus sum aliquando in *Menochii & Mascardi* libris de Praesumptionibus & Probationibus; qui quanticumque sunt, poterunt tamen in paucas vix plures quam 100. naturalissimas regulas ita contrahi, ut liceat inde cetera omnia manifesta consequentia derivare. Laborem illum nostrum Compendium Menochii & Mascardi de Probationibus & Praesumptionibus inscribemus.

§. 27. *A titulis* eorumque dispositione veniamus ad *subtitulos*. *Subtituli* autem hi sunt, forma seu definitio, subjectum, causa, effectus, contrarium seu destructivum. Non ignoro, varie a variis haec assignari; sed si accuratius dispe- xeris, omnia ad haec reducuntur. In his digere- rendis in primis diligens est *VVesenbecius*, & illi quoque qui classes actionum scripsere, *Oldendorpius* & *Haersolte*. Sed de subtitulis fusius dicere ad *doctrinam topicam* pertinet. Hi igitur *subtituli* in quolibet titulo seu materia sunt ob- servandi.

§. 28. Et haec de *jurisprudencia didactica*, seu elementis juris, quae non jurisconsultis solum sed & theologis, medicisque tenenda sunt: nam Theologiam, Jurisprudentiam, Medicinamque didacticam decet theologos, jurisconsultos, me- dicos, singulos cuncta scire; etsi interea necesse non sit; unum in controversias & subtiliora al- terius se intromittere, quae ad partem cujusque

polemicam pertinent. Et scio, magnos viros in Senectute poenitentiam egisse spretae in juvenia jurisprudentiae, quae quantum theologo prodesse possit, demonstravimus supra (§. 5.).

§. 29. *Tantum de jurisprudentia didactica, nunc ad historicam pes promovendus. Jurisprudentia historica est vel interna, vel externa: illa ipsam jurisprudentiae substantiam ingreditur, haec administriculum tantum est & requisitum. Historia juris interna est, quae variarum Rerumpublicarum jura recenset; qualia exstabant olim opera Aristotelis, & Theophrasti, sed quibus ad nostram usque aetatem vita non superfuit. Habemus Leges Mosaicas in Sacra Scriptura, quarum cum Romanis comparationem paulo post Justinianum graeculus aliquis instituit; hodie vero diligentiores ea in re operam Zepperus navavit. Legum Aegyptiarum, Persicarum, Scythicarum exstant reliquiae apud Herodotum, in fragmentis Ctesiae & Diodoro Siculo. Graecorum instituta diligentissime persecutus est Pausanias, & nostri aevi velut alter Pausanias, Meursius. Jura Romanorum satis cognosci ex variis eorum monumentis possunt, de quo mox. Gentium primo barbararum postea excultarum jura, scilicet Longobardorum, Gothorum, Francorum, Leges Salicae, aliaque id genus vetustatis monumenta collegit, unoque volumine edidit Lindenbrogius: Nihil dicam de Bullariis Pontificum, nihil de Gallico Codice Land-recht, & Veichbild Saxonum, statutis Polonorum, corpore juris prutenico, consue-*

suetudinibus Itatorum magnam partem collectis a Cardinali *Tusco*, nihil de juribus Saxonum, Hungaricorum, consuetudinibus marchicis, aliisque id genus gentium moribus prope infinitis. Ex his aliisque omnibus undecumque collectis, Deo dante, conficiemus aliquando Theatrum Legale, & in omnibus materiis, omnium gentium, locorum, temporum placita *παράλληλως* (a) disponemus. Historia Juris Romani in specie etfi a *Forstero* in Historia Juris, & *Jac. Goshardo* in Manuali adumbrata sit; desidero tamen specialiore recensitionem, quid a quolibet Tribuno per plebis scita, aut a quolibet consule per senatus consulta, praetore per edicta, & imperatore per constitutiones ordine innovatum sit, donec in hanc formam Jus Romanum crevit. Hoc igitur nos, libello de Auctoribus Juris Romani, aliquando exsequemur, qui libenter ab aliis neglecta aggredimur.

§. 30. *Historia externa* ad Jurisprudentiam necessaria est: *Historia Romana* ad intelligendum jus civile: *Ecclesiastica* ad intelligendum Jus Canonicum: *medii aevi* ad intelligendum jus feudale: *nostrorum temporum* ad intelligendum jus publicum.

§. 31. *Historia Romana* est quadruplex, Reipublicae liberae, historia augusta, historia Imperatorum Graecorum ante Iustinianum, & denique post Iustinianum. Historia Reipublicae liberae per compendium tradita est tum a L.

E 3

An-

(a) *compare.*

Annaeo Floro in Compendio Rerum Romanarum per *Freinshemium* exornato; tum in alio *Floro* Livii epitomatore, de quo Martialis,
Pellibus exiguis arctatur Livius ingens,
Quem mea vix totum bibliotheca capit;
 denique in *Justino* epitomatore *Trogi*, quem *Matth. Berneggerus* accurate perpolivit. Fusius vero res romanas ante Augustum describere *T. Livius Patavinus*, *Dionysius Halicarnassensis*, *Plutarchus* in *Parallelis*; *Dio* vero transitum Romae a democratia ad monarchiam memoriae consecravit. Nec inutiliter recentiores addentur *Job. Zamoscius*, *Carolus Sigonius*, *Fr. Robortellus Manutius*, *Turnebus*, *Lipsius*, *Jos. Scaliger*, *Tb. Demsterus a Muresk*, *Octavius Ferrarius*, *Fortunius Licetus*, *Janus Gruterus*, in primis ejus *Fax Critica* (velut tractatus tractatum philologicorum) & Inscriptiones, quarum supplementis cl. vir. *Tb. Reinesius* immortalis est. Nihil de *Salmasii* *Pallio* & *Militia Romana*, *Budaei*, *Gronovii* *Sestertio*, *Bartholini* *Penula*, *Barthii* *Adversariis*, variis denique variorum in Rem Romanam curis dicam. Addi poterunt ii, qui in notis ad auctores sua collectanea per occasionem effuderunt. Ex hac historia haurientur leges XII. tabularum, jura praetoria, origo jurisconsultorum, & quaecumque Ciceronis aevo vel antea apud Romanos obtinuerunt. Illo tempore jurisprudentia Romana nihil a naturali recesserat, quia nondum ad libidinem dominantium Leges inflectebantur.

§. 32. *Historia Augusta* est ab Augusto usque ad Constantinum Magnum: unde & ita inscribuntur variorum historicorum libri a *Frid. Sylburgio* editi, & in Belgio aliquoties aliter formati. Hanc nobis reliquere *Dio cassius*, *Svetonius*, *Tacitus*, *Vellejus*, *Herodianus Graecus* scriptor, *Aelius Lampridius*, aliique minutiores. Nec parum ad illustrandam illam conferunt panegyrici variorum, qui nunc ut plurimum *Plinii Junioris* Epistolis adiunguntur, Ad-dendi, qui sub Imperatoribus florere, *Philo*, *Iosephus*, *Martialis*, *Statius*, & scriptores Ecclesiastici *Tertullianus*, *Cyprianus*, *Eusebius*. Sub Imperatoribus autem jura romana multum a prisca simplicitate recesserunt: primus Augustus fideicommissa introduxit & codicillos; sub Hadriano Edictum Perpetuum concinnatum est: quid Marcus, Verus, Commodus, Severus & Antoninus, Diocletianus denique & Maximianus contulerint, partim Codex, partim jurisconsultorum reliquiae docent.

§. 33. *Historia graeca ante Justinianum* a Constantino Magno usque hauriri potest ex scriptoribus historiae ecclesiasticae, & profanis *Ammiano Marcellino*, *Zonara*, *Orosio*, *Jornande*, *Procopio*, tum in historia dudum vulgata, tum in primis in historia arcana, ubi Justiniani vitia detexit, quae a *Nic. Alemanno* primum edita, a cl. *Eichessio* Helmestadii revisa est: *Tb. Riviut* Anglus scripsit apologiam Justiniani contra *Procopium*, & *Paganinus Gaudentius* tractatum eleg-

gantem de Moribus Saeculi Justiniani. Legantur huc *Sidonius Apollinaris*, *Ausonius*, *Claudianus*, Epistolae *Symmachii*: addatur Notitia Imperii Orientalis & Occidentalis per *Guidonem Pancirolium* cum notis edita, ad intelligendum *librum* 1. 10. 11. 12. Codicis: nec inutiliter legetur *Fr. Hottomanni Anti-Tribonianus*.

§. 34. *Historia sequioris Graeciae* sumenda in primis ex *Cedreno*: status aulae ex *Curopalatae* libro de Officiis: addantur & duo auctores graeci, quorum unus scripsit historiam *Mauritii*, alter historiam *Captae Constantinopoleos*; quos edidit cum notis *Jesuita Pontanus* (nominum non recordor, quia sine libris sum): denique *Originem & Gesta Turcarum* persecutus est *Laonicus Chalcocondylas* graecus. *Saracenorum* historia ab *Elmacino* scripta est: expeditiones in *Palaestinam*, seu bellum sacrum, grandi libro exponuntur, cui titulus est, *Gesta Dei per Francos*: jura vero sequioris Graeciae ex *Basilicis* constant, & *Epitome Harmenopuli*, aliisque reliquiis diligenter recensitis a *Jac. Gothofredo* in *Manuali*, quem non exscribo. Jus hoc graecum admodum illustravit *Jac. Cujacius*: nostris temporibus multum in eo posuit operae *Carolus Hannibal Fabrotus*: *Josephi Mariae Suaresii* *Notitia Basilicorum*, recentissimae gallicae *Basilicorum* editioni addita est. Multa adhuc latent non in Oriente tantum, sed & in bibliothecis *Europae*; quemadmodum spes facta est, budensem nuper *Viennam* translata nonnulla hujus
gene-

generis attulisse, quae paulatim omnia dies producet.

§. 35. Post *historiam romanam* ad intelligendum jus civile, sequitur *ecclesiastica* ad intelligendum jus canonicum, quae est vel *totalis* vel *partialis*. *Totalis* est vel *compendiosa* vel *fusa*. *Fusa* est in *Centuriatoribus Magdeburgensibus*, *Annalibus Baronii*, *Annalibus Bzovii* Baronium continuantibus: addantur *Torniellus*, & *Salianus*. *Compendiosa* est *Pappi*, *Job. Henr. Hottingeri*, *Gothana nupera*, *Job. a Laet. Historia Universalis*, cujus dimidiam semper partem rebus ecclesiasticis magno studio impendit, *Spondani Epitome Baroniana*.

§. 36. *Historia Ecclesiastica partialis* est *Rituum*, *Martyrum*, *Patrum*, *Dogmatum*, *Conciliorum*, *Haeresium*, *Regiminis*, *Pontificum*, *Ordinum Ecclesiasticorum*. De ritibus habemus *Job. Baptistam Casarium*: adde in primis, quae in commentario ad dictum *Tertulliani* sunt non nascuntur *Christiani* part. 1. ordine alphabetico collegit cl. *Zimmermannus*: huc legenda *Casauboni* *Animadversiones* ad *Baronium* *Richardi Montacutii* & *Baronio* & *Casaubono* adversantis scripta, *Salmasii Apparatus*, varii tractatus *Job. Dallaci*. De martyribus sunt variorum *Martyrologia*, ut *Beda*, *Ussardi*, *Molani*, *Baronii*: huc pertinet tractatus de *Suppliciis Veterum Christianorum* *Nic. Gallonii*, item *Vitae Sanctorum* per *Laurentium Surium* grandibus tomis comprehensae. In *Patribus*, qui scripta nobis reliquerunt, variorum diligentia se exercuit.

§. 37.

§. 37. *Historia dogmatum ecclesiasticorum*; seu quid quolibet tempore & loco quisque in quolibet articulo senserit, diligenter collecta est a *Dionysio Petavio* ex Catholicorum sententia in grandi illo de Dogmatibus opere totam Theologiam complexo. Dogmata autem ut plurimum in conciliis stabilita sunt: hujus igitur loci est historia conciliorum, quam contraxere *Fr. Longus Coriolanus* in Summa Conciliorum, & *Barth. Cavanza* in Summa Conciliorum & Pontificum. Ipsi vero tomi conciliorum Coloniae primum editi sunt, postea aliquoties in Gallia, & postremum sumptuosissimo illo opere regia pecunia accurato: aliam, ut audio, editionem minus splendidam sumptuosamque Galli compressioribus litteris moliuntur, ne plane destituatur utilissimo opere, cui arctiores paulo res sunt.

§. 38. *Historiam Regiminis Ecclesiastici* seu Hierarchiae fuse pertexuit *M. Antonius de Dominis* in Republica Ecclesiastica: adde scripta de Potestate Papae *Roberti Bellarmini*, & contra Bellarminum *Guilielmi Barclaii*, & ipsius regis magnae Britanniae *Jacobi*, cui se opposuit *Matthaeus Tortus* personatus scriptor pro Bellarmino, quem excepit edita pro rege Tortura Torti: addantur varii scriptores de Hierarchia Ecclesiastica Catholicis; item qui scripsere de Libertate & Privilegiis Ecclesiae Gallicanae, quorum posset texti catalogus ingens; item qui pro Ludovico Bavaro Imperatore scrip-

pse-

psere, *Marsilius Patavinus*, *Guilielmus Occamus*, alique quorum reliquias in unum volumen collegit *Melchior Goldastus*. *Historia Pontificum* exstat *Platinae*, *Onuphrii Panvinii*, *Stellae*, *Dietrichii* &c. Huc pertinet *historia Cardinalium*, & prodiit sane nuper de Cardinalibus commentarius: exstat & tractatus *Freinsheimii*, in quo ventilatur, quaestio praecedentiae inter Sac. Rom. Imperii Electores, & Cardinales. *Episcopatum*, *Monasteriorum*, *Templorum*, aliorumque quae posterioribus ecclesiae temporibus invaluerunt, historia collecta est a *Rud. Hospiniano* reformato in libris de Origine Templorum & Monasteriorum: cui jungi potest *Himmelius* de Canonatibus, & *Historia Academicarum Joh. Middendorpii*, *Lanfi*, *Limnaei*: quo pertinet *historia Theologiae scholasticae*, quam in Prolegom. ad Petr. Lombardum perstrinxit *Lambertus Danaeus*. Possem hic longum catalogum eorum texere, qui variorum Ordinum in specie annales scripsere, v. g. *Minoritarum*, *Dominicanorum*, *Cisterciensium*, *Carmelitarum*, *Augustinianorum*, *Carthusianorum*, *Minimorum*, *Societatis Jesu* &c., si necessaria esset jurisconsulto specialis horum cognitio. Societatis tamen Jesu historia in primis digna legi, ea maxime, quae Romae in folio prodiit, & toties continuatur, quoties aliquis Generalis decessit: item Bibliotheca Societatis Jesu, quam edidit *Phil. Alegambius*. Ita igitur *historiam ecclesiasticam* absolvimus jurisconsulto politicove hodie-

dierno accurate cognoscendam, ne plebis more imperito zelo rapiatur; sed ut, cognitis omnium opinionum principiis, possit sine affectu defaecata mente judicare: multum enim negotiis civilibus religionis tractatio immiscetur. Plerumque autem in singulis historiae ecclesiasticae capitibus, ex omnibus religionibus in Imperio approbatis auctores adduximus, ne quis ab adversae partis homine sibi imponi vereatur.

§. 39. *Historiam Ecclesiasticam* ad intelligendum jus canonicum sequitur *historia rerum germanicarum seu medii aevi*, ad intelligendum jus feudale. Huc pertinent plurimi illi minuti scriptores, quales *Otto Frisingensis*, *Abbas Urspergensis*, *Adamus Bremenensis*, *Albertus Stadenensis*, *Gobelinus Persona*, *Luitprandus*, *Guntbertus in Ligurino*, *Sigebertus Gemblacensis*, *Saxo Grammaticus*, aliique passim a *Simone Schordio* aliisque in tomis *Rerum Germanicarum* editi. Nil dicam de iis, quos in Anglia eruit *Seldenus*, quos in Polonia recensuit *Starovolscius* in *Hecaton-tade* *Scriptorum Polonicorum*. Nec inutiliter accedent *Chronica*, *Lehmanni Spirense*, *Kyriandri Trevirense*, *Nic. Serarii Moguntinum*: item *Annales Danici* *Job. Is. Pontani*, & omnino *Res Septentrionales Olai Magni*, *Res Islandicae* descriptae per *Jonam Arngrin*, *res Anglicae* per *Cambdenum*, *Scoticae* per *Buchanarum*, *Hibernicae* in edita non ita pridem *Lyra Hybernica*, *Gallicae* per *Paulum Aemilium*, *Job. Tilium*, *Serranum* in *Inventario*, *Hispanicae*

nicae per *Marianam*, Lusitanicae per *Osovium*, Bohemicae per *Dubravium*, Polonicae per *Cromerum*, Misnicae per *Fabricium Chemnicensem*, Frisicae per *Ubbonem Emmium*, Vestphalicae nuper per *Job. Justum Vinckelmannum*, Belgicae per *Ant. Thysium*, Silesicae per *Curævum*, Charinthiacae per *Megiserum*, Austriacae per *Cuspinianum & Gerbardum a Rhoo*. Helveticae per *Stumpbium*, Slavicae per *Helmoldum*, Venetae per *Bembum*, siculae per *Fazellum*, Suevicae per *Crusium*, Bavaricae per *Aventinum*, Ungaricae per *Ortelium & Nadaßii* *Florum ungaricum*; omnes congerere nihil opus. Addantur, quod res germanicas attinet, scripta *Freberi*, *Goldasti*, *Meyßonii*, *Lindembrogii*, *Covini*, *gii*; & *Besoldi*. Addantur, qui de originibus feudorum scripsere, in primis *Cujacius & Hottomannus*, *Hottomanni* item *Franco Gallia*, multique alii gloriae numquam intermoriturae viri item lexica germanica, de quibus in *jurisprudencia exegetica* infra.

§. 40. *Historiam mediæ ævi* ad intelligendum jus feudale sequitur *historia hodierna* ad intelligendum jus publicum. *Hodiernam* autem appello, quæ proximum & præsens sæculum decimumsextum & decimumseptimum completitur. Superioris sæculi res plerumque religioni involutæ sunt: eas describere *Sleidanus*, & æmuli *Sleidani*, *Gennepius*, & *Laurentius Surius*. Huc pertinet *Historia Concilii Tridentini Petri Snavis Polani*, id est *Pauli Sarpii*
vene-

Venetii, de qua iudicium suum exposuit auctor dissertat. de Tribus Historicis Concilii Tridentini. Instar omnium est *Jac. Aug. Thuanus*, vir veterum laudibus nihil cessurus, Livius nostri aevi, in stupendo Historiarum volumine. In rebus belgicis excelluit *Em. a Meteren*, & nulli veterum virtute secundus, Tacitus nostri saeculi, *Hugo Grotius* in Annalibus Belgicis. Bellum cyprium a federatis cum Turca gestum descripsit *Petr. Bizarcus*. Nostro saeculo legendus est *Grammondus*, & de bello germanico *Carassæ* in Germania Sacra Restaurata, & brevis sed elegantissimus auctor Compendij Rerum Germanicarum anonymus, qui a primis bohemis initis ad Lipsiam usque a Torstensohnio captam pervenit; nec praetereundus *Bogeslawus a Chemnitz*, si verum hoc ejus nomen est, qui fusc res germanicas explicuit. *Grammondæ* quaedam de proximis temporibus adhuc premuntur, ut audio, edenda quum periculum abfuerit: commendatur & historia horum temporum *Vi&. Syri*. Nihil dicam de Theatro, nihil de Diario Europaeo, vastis operibus semperque crescentibus. Vigilandum vero in primis est in colligendis scriptis publicis varia occasione prodeuntibus, manifestis, pasquillis, aliisque, ex quibus singularis rerum cognitio hauriri potest. Talia collegit *Hortlederus* in libro *von Ursachen des Kriegs in Deutschland* *Lundorpius* in Actis Publicis nuper recensis, ejusque continuator *Meyerus*. In primis quoties

con-

controversiae juris publici scriptis editis ventilatae sunt, danda jurisconsulto opera est, ut potiat, quales causae tutelae Palatinae, Donavverdensis, Brunsvicensis, Erfordiensis, VVildfangiatus, juris coronandi inter Moguntinum & Coloniensem, aliaeque publice celebratae: consulantur, quae nuper cl. vir *Job. Th. Sprengertus* de Praetensionibus Illustribus, & alias juris publico illustrando composuit. Etsi autem & *Dominicus Arumaeus* & *Job. Limnaeus* de Jure Publico grandibus libris differuerint; tam multa tamen aliena immiscuere, ille ex jure privato, hic ex historia & philologia, ut ego non dubitem, quin omnia, quae revera juris publici sunt, ex iis in brevem libellum contrahi possint. Unde molior Compendium Juris Publici ex Arumaeo & Limnaeo, nihil superflui admissurum, nihil necessarii omissurum. Interea *Lampadius* legatur, in quem Notae egregii viri *Herm. Conringii* dudum expectamus. Prae *Hippolyti a Lapide* de Ratione Status famoso prope in Domum Austriacam libello legatur commentarius de Ratione Status cl. viri *Job. VVolfsg. Textoris*, & *Stephani de Monzambano* nuperrimus, ambo lectu digni.

§. 41. Hoc loco operae pretium esset conscribi *historiam irenicam* a primis schismatis initiis ad nostra usque tempora. Tentarunt enim conciliationem *Erasmus Roterodamus*, *Fhil. Melanchthon*, *Mart. Bucerus*, *Julius Pflug* Episcopus Numburgensis, ceterique, quorum consilio,

bouo



bono sane si successum habuisset, *interim* confectum est. Inde concordiam moliti sunt, rationesque ejus inaeundae partim ediderunt *Geor. Cassander*, *Georg. VVicelius*, *Andreas Fricius Modrevius*, *Cardinalis Lotharingius* in Colloquio Possiaceno cum *Theod. Beza* recensente *Thuano*, deinde *Jac. Acontius* in libro de Stragematis Satanae. *Marcus Antonius de Dominis*, *Pareus* in *Irenico*, ipse *Thuanus* in praefatione *Historiarum*, *Grotius*, *Calixtus* in *helemestadiensi*, *Dreierus* in *regiomontana Academia*, auctor, sed minime ferendus *Irenici Irenicorum* cum *Comenio* velitatus, *Job. Duracus Scotus*, *Job. Matthaei* Episcopus *Suecus* in *Ramo Olivae Septentrionalis*, denique proxime Collocutores *Rintelenses* & *Pacificatores Marchici*. Hi ut iterum dicam, propterea jurisconsulto cognoscendi sunt necessario, ut discat distinguere controversias, designatque in alios ob qualemcumque opinionis, vel caerimoniarum dissensum fulminare.

§. 43. A *jurisprudencia historica* pergo ad *exegeticam*: nam etsi *exegetica* quodammodo *historica* sit, enarrat enim, quis de facto sensus fuerit legislatoris; tamen, quia latissime fusa est, merito separatim tractatur. Duplex autem est, alia *ex textu*, alia *ad textum*. Illa ex variis textibus simul, non ordine textuum, sed alio aliquo colligitur; haec vero *ad* (a) ad ipsos textus accommodatur, librisque immediate alligata

(a) *pedem non discedendo*

ta est. Illa pertinet ad *philologiam juris* ad imitationem *Philologiae Sacrae Sal. Glassii*, haec ad *commentarios juris*.

§. 43. *Philologia juris* consistit in applicatione disciplinarum ad jurisprudentiam, & dividitur in *grammaticam*, *didacticam*, *rhetoricam* (quo pertinet & *poetica*), *historiam*, *ethico-politicam*, *logico-metaphysicam*, *physicam* denique *legalem*; de quibus pluribus in nostro Specimine Quaestionum Philosophicarum ex Jure Collectarum: add. cl. viri *Christiani VVoldenbergii* Jurisconsulti *Rostochiensis Manipulos Juris*. Si cogitata nobis exequi licuerit, ejus rei tunc specimen dedimus, totam aliquando tentabimus elaborare, ac titulo *Philologiae*, ac *Philosophiae Legalis* in medium producere; quam in rem multa non vulgaria a nobis sunt observata.

§. 44. *Grammatica legalis* ante omnia requirit *concordantias juridicas*: ea enim in parte hactenus theologi jurisconsultos vicerunt; nolim tamen rem ad eam nimietatem, qua theologi ipsi nunc laborant, excrecere. Possent & theologicae & juridicae concordantiae esse portatiles; si observarentur tantum loca insigniora, & in iis usus vocis singularior; quid enim opus omnia penitus similia colligere? observetur autem vocis
 1) *significatio*, 2) *derivatio*, 3) *apposita*, quando substantiva conjunguntur; v. g. voces *vis* & *potestas* saepe conjungi observatum est, ut in definitione tutelae vulgo adnotant, 4) *epitheta* & 5) *constructio vel declinatio*; v. g. *vis* in genitivo
 F tivo

civo apud Jurisconsultos usurpatur hujus *vis*. Sunt igitur hae *juris concordantiae* nihil aliud, quam index verborum.

§. 45. Has sequitur *lexicon juridicum*, quod refert ea quoque ad vocem, quae in libris legum reperta ad eam pertinent; etsi non nominetur v. g. quoties vocabuli synonymia vel periphrasis, non ipsum vocabulum ponitur: hoc non potest in *concordantias*, sed in *lexicon* sub illud vocabulum referri: huc pertinent & homonymiae ex variis legum locis colligendae. *Lexicon* etiam non ad solos juris libros restrictum est, sed per omne interpretum genus volitat, usumque vocabulorum ex iis observat; quia hodie communis doctorum modernorum opinio magis saepe in decidendis controversiis, quam vetus Romanorum lex, valet. *Lexicon* autem *juridicum* non tam opus est novum confici, quam augeri vetera, qualia, sunt *Oldendorpii*, *Schar-dii*, *Calvini*, *Speidelii* latina, ex quibus sequens ut plurimum praecedentem exscripsit, auctoque parum ejus labore, minime laudanda ambitione suum nomen indidit; deinde *VVeßneri* in *Observationibus Besoldi* in *Thesauro Practico*, *Speidelii* in *Notabilibus*, germanica: *Speidelius* vero ceterorum supplementis auctus, titulo *Speculi*, in folio prodiit: *Besoldum* quoque cl. *Diez-berrus* revidendum augendumque Noribergae nunc sub manibus habet. Quumque voces in his *Lexicis* occurrentes ut plurimum sint aut germanicae, aut barbarae ex germanicis in latinas de-

detortae; hinc legendi qui de germanicis vocibus commentati sunt, quales *Job. Goropius Becanus* in variis operibus, *Job. Isacus Pontanus* in Originibus, *Schoettelius* in der Deutschen Sprachkunst, multique alii *Schoettelio* citati. Voces latino-barbaras collegit *Gerb. Job. Vossius* in opere de Vitiis Sermonis, graeco-barbaras *Meursius* in Glossario.

§. 46. Sunt & alia *grammatica* ex jure observanda, v. g. orthographia legalis *Olingerii* prodit; & pretium operae est considerare rationem scribendi in *Pandectis Florentinis* mire diligentem & accuratam, & retinentem antiquitatis: nec praetereundae notae veterum, quarum hinc inde fragmenta supersunt: memini, videre me peculiare veteris cujusdam auctoris de Notis opusculum: addatur & *Justi Lipsii* elegans de Notis epistola, ac super eam *Comm. Meisneri* in *Misnia* rectoris: nec negligendae singulares quaedam in jure loquendi rationes examinatae a *Laur. Valla*, defensae a *Budaeo*: priscianissimos quin etiam juris observare sibi visus est *Ant. Matthaei* in Collegio Fundamentorum Juris: nec abluunt ab hoc loco derivationes quaedam juridicae ridiculae, v. g. *Varronis* de fundo, qui mitti possit funda, *Accursii* de irenarchis, quod iram arceant, nescio cujus ex schismaticorum grege de Ecclesia Laterana, quae dicatur quasi latens rana, quam ibi Nero evomuerit, &c.

§. 47. Nec contemnenda ad *rhetoricam* colligi ex jurisconsultis veteribus possent; quemadmodum enim de *tropis Scripturae* scripsit *Barth. Westbemerus*, ita de *tropis legum* neminem adhuc scripsisse miror, nisi quod cl. *Voldenbergius* quasdam juris metaphoras, adagia, versusque glossae collegit. *Formulas* etiam ex jure operae pretium esset colligi, v. g. inchoandi, finiendi, increpandi, refutandi, laudandi. Ita posset jurisconsultus in scribendo stilo legum ut, quemadmodum theologi sacro, quod esset ei ornamentum insigne. Huc pertinerent *adagia juris* (vid. *Dn. Brandes* id admonentem in tract. de Vera Jurisprudencia: specimen dedit *Dn. Voldenbergius*) quemadmodum *adagia sacra* scripsit *Martinus Del Rio & Zebnerus*, *adagia Patrum Aloys. Novarinus*. De *charactere* etiam seu forma orationis in legibus multa non contemnenda dici possent, quae alia est in Digestis & Constitutionibus Imperatorum veterum, & alia prolixior longe & loquacior in Constitutionibus Imperatorum graecorum: unde insignes viri saepe latentem sub veterum Jurisconsultorum nomine *Tribonianum*, praeminentibus velut *arcadici pecoris auribus*, stili judicio deprehenderunt. Ad *poeticas* h. l. observationes pertinent versus casuales, seu qui auctoribus praeter opinionem excidere. Tales nonnullos ex jure *Bachmannus & Helvicus* observavere in Poetica Gießensi, *Gothofredus* quoque nonnumquam in *Notis*, *Bartbius* in *Adver-*

Adversariis, & *Vossius* in Institutionibus Oratoriis.

§. 48. *Didactica juridica* est haec ipsa quam nunc scribimus, in qua methodus disponendi, docendi, discendi juris explicatur: quo pertinent variorum reperta mnemonica, vel per versus, v. g. *Memoriale Juridicum Bucksylberi*, vel per figuras picturasque. Quidam virginem commenti sunt vario ornatu, per cujus lacinias & mundum muliebrem tituli juris concordantes justo ordine diffundebantur. Fuit & qui asini figura omnes juris materias repraesentare conatus est: posses hanc vere pontem asinorum dicere. Sed tutissimum mnemonicae genus est methodus solida & accurata. Pertinent ad *didacticam* & *gradus legum*: qua in re prodiit non ita pridem opusculum Heidelbergae mira diligentia concinnatum, cujus auctor, perlectis expensisque legibus, omnes totius corporis in 5. *gradus* distribuit necessitatis & utilitatis. Qui labor mire poterit juvare eum, qui juris corpus perlecturus est; habet enim in illo libello *δακτυλοδιδικτην* (a) utiliorum & maxime necessariorum. Operae pretium esset, si in nova aliqua editione corporis juridici pro singulis *gradibus* certa legibus signa adderentur; ita haberet lector uno obtutu, quid quando sibi legendum vel transiliendum esset. Add. catalogum legum difficiliorum, &, ut ipse vocat, *Candidatoriarum* in Manipulis cl. *VVoldenbergii*.

F 3

§. 49.

(a) *Indicem*.

§. 49. *Historia legalis* dudum praelibata est (§. 29.), ubi occasione historiae externae, quae magis requisitum quam pars jurisprudentiae est, internam quoque praeoccupavimus: hoc tamen loco addenda, quae ad *exegeticam* pertinent, cohaerentia legum in Digestis apud suos auctores, quam ope τῶν ἐπιγραφῶν (a) magno studio in Indice suo concinnavit *Jac. Labittus*, cujus opera effectum est, ut *Paulum*, *Ulpianum*, *Cajum*, *Modestinum* non laceratos, sed continuos habere nobis videamur. Quatuor usus per exempla demonstravit *Labittus*: potissimus est, quod cognita hac ratione συνάφαι (b) textus, lex legem explicet, & ἐναντιοπαρεῖαι (c) tollantur. Pertinet & ad *historiam legum* Catalogus Abrogatorum *Bigonii*, & ἀμαρτήματα μνημονικά (d) multis insignibus viris non vitata; qualia in tit. de Orig. Jur. nonnulla admisit *Pomponius*, aut potius, quod volebat *Hottomannus*, sub ejus nomine *Tribonianus*.

§. 50. *Ethica & politica legalis* sequitur, quae de re *Olingerus* in *Ethica Legali*. *Vincentius Turturetus* in *Parallelis Ethico-juridicis*, *Ad. Keller* in *offic. Jurid. Polit.* *Bodensteinus* in *Jurisprudentia Politica*. Multa etiam ad ethicam politicamque pertinentia in suo *Commissario* requisivit & explicuit *Rutgerus Rulant*: *Jacobus Gorbosfredus* quoque in suo *Manuali* per totum juris

(a) *Titulorum.*

(b) *Connexione.*

(c) *Dissonantiae.*

(d) *Lapsus memoriae.*

juris corpus axiomata quaedam magnam partem ethico politica collegit, quibus ordo tantum certus systematicus facili negotio addendus deest: add. sententias ethico-politicas in cl. *VVoldenbergii* Manipulis. *Physica* vero juris fufe explicata est in *Pauli Zacchiae* Quaestionibus Medico legalibus, & *Job. Bapt. Codronchii* Methodo Testificandi in Quaestionibus Medico Oblatis: *Geometriae juridicae* Specimen dedimus in ratione reddenda l. ult., D. fin. regund. Specim. Quaest. Philos. ex Jur. quaest. 3. *Arithmeticae juridicae* copiosa in legibus est messis: addatur *Budaeus* de asse & *Job. Bapt. Costa* tr. de Quota & Rata, & nos in *Arte Combinatoria*, problem 3. n. 16.

§. 51. Sed *logica* in primis & *metaphysica* juris omittenda non est, seu regulae quaedam philosophicae in jure obtinentes, quas regulis juris vulgo male immiscent. In regulis talibus studium posuere auctores plurimi *logicarum juridicarum*, *Fr. Hottomannus* in Institutionibus Dialecticis, *Job. Dh. Freigius* in Logica Jurisconsultorum, *Mart. Schikardus* in Logica Juridica, *Nic. Vigelius*, *Matth. Stephani*, & *Dan. Otto* in Dialecticis Juris, *Nic. Everhardus* in Locis Argumentorum Legalibus, & *Georg. Adamus Brunerus* in Synopsi Topicorum Everhardi, *Job. a Felde* in manuscriptis. Notis ad Topica Aristotelis, ubi cunctas fere in illis regulas longe supra millenarium numerum excrecentes, selectis exemplis juridicis illustrat: dignum opus cui ab auctoris manu ultima lima accedat, &

typis publicis digna vestis. Hi igitur ex professo regulis philosophicis ex jure abstrahendis operam dedere. Idem obiter ac passim fecere barbari illius aevi jurisconsulti in suis ad leges commentariis, quorum non minima pars erat regularum generalium ex lege eliciendarum cura, adeo ut ad extremum nimia ac paene superstitiosa esset. Quid barbarius, quam ex L. Barbarius. D. de Offic. Praet. exculpere regulam, *quod error communis faciat jus*? Non tamen ob hos naevos veterum nobis regularum & brocardicorum studium plane abiiciendum est, quod *Jac. Cujacius* & *Claudius Cantiuncula* nimio vehementius suaserunt. Ad hanc *logicam juris* pertinent jurisconsultorum rationes definiendi, dividendi, casus formandi per artem combinatoriam, quae *Jac. Gothofredo* in *Manuali Artis causandi* nomine veniunt, *Paulo Busio* *Subtilitates Juris*: item legum παραρρέματα (a) logica & petitiones principii, quarum aliquas peculiari dissertatione Collegio Fundamentorum inserta collegit *Ant. Matthaei*. Observavimus & syllogismos eorum nonnullos in forma peccantes. Huc pertinet & methodus in qualibet materia tractanda seu titulo observata, quae in Digestis satis bona est, in Codice nulla; ibi enim Tribonianus non rerum, sed temporum sequutus est ordinem.

§. 52. Ad hanc *logicam juridicam* pertinent & *conciliatio antinomiarum*. Hic vexatissima quaestio,

(a) *Lapsus per negligentiam.*

stio, *denturne in jure antinomiae?* De quo ego non magis dubito, quam de veritate horatianae sententiae.

Atque opere in magno fas est obrepere somnum, praesertim quum plures operis socios non iisdem semper credibile sit consiliis usos. Immo quicumq.; vestigia juris veteris in Digestis superesse tradunt, eo ipso admittunt antinomias; volebat enim Justinianus, & profitebatur Tribonianus vetera omnia sublata. Quid dicam de contrariis inter se jurisconsultorum sectis? Et sunt leges quaedam, ubi in terminis unus alium dissentientem allegat, cujus deinde dissensus alio in Digestis loco expresse reperitur. Idem cl. jurisconsulti docent ab aliis longo agmine introducti solius sacrae Scripturae est sibi ubique constare. *Ars solvendi antinomias* consistit in eo, ut tueamur, aliud subjectum vel predicatum esse in hac, aliud in illa lege vel propositione, vel utrumque esse idem. Quibus autem modis probari Aristoteles diversitatem & identitatem posse ostendit, tot modis solvi possunt antinomiae, quod nos in peculiari commentario de Arte Solvendi Antinomias plenius ostendemus. Antinomias porro juris nobilissimas jam olim plerasque glossatores veteres ante aut circa Accursium collegere: non ita multae a posterioribus jurisconsultis inventae & superadditae sunt, sed contra conciliatio solida ut plurimum recentius reperta est. Accursius conciliationibus abundat, sed incertissimis, quod ipse perpetuo illo suo, *vel dic*, fatetur,
Sed

Sed magni illi jurisprudentiae restauratores *Duarenus*, *Cujacius*, *Hottomannus* gordios hosce nodos plerisque secuerunt: ex quorum scriptis conciliationes in unum collegere *Hub*, *Giphanius*, *Pacius* Centur. *ἐναρτιστικῶν* (a), *Nicol. a Salis* in *Sicilimentis Juris Nic. de Passeribus* in suo illo libro, ubi se jactat antinomias omnes solvisse, & reliqua ignobilior turba. Nos desideramus brevem antinomiarum recensionem vix quatuor plagulis constantem; ubi addatur una solum primaria solidaque solutio, allegeturque ejus primus inventor; aut si insolubilis antinomia est, id quoque magni alicujus viri auctoritate breviter admoneatur. Tale breviusculum opus, sed discipulis utilissimum, quum otium erit, *Antinomici* minoris titulo moliemur; Major enim est, qui fusa varias auctorum solutiones, rationesque earum ac difficultates enarrat.

§. 53. *Philologiam ac philosophiam legum* absolvimus tamquam interpretationis praeliminaria: sequitur *Interpretatio legum* ipsa, quae est vel *simultanea*, unius legis cum alia, vel *solitaria*, cujuslibet pro se. *Simultanea* est, quando vel *series legum* ostenditur, vel *summa*, vel *paratitla* conficiuntur. *Series legum* haberi non potest, nisi habita *serie titulorum*. *Series titulorum* a multis adumbrata est in suis oeconomis juris, ut a *Vvesenbecio* & *Giphano*; tabellis usus est *VWilb. Schmuccius* in *Nervosa Synopsi Juris Civilis & Canonici*, quum ceteri plerique

(a) *Dissonantiarum*.

que posterius neglexerint. Ex recentioribus laudantur tum tabulae clariss. viri *Job. Ottonis Thaboris*, tum series titulorum juris civilis inserta egregio Manuali *Jac. Gothofredi*, ubi ille plurimos nodos ex historia & Edicti Perpetui ordine dissolvit. *Series legum* cujuslibet tituli in Digestis & Decreto ad certam aliquam ex re sumptam rationem, atque ita ad tabulas reduci potest; quod non patiuntur Codex & Decretales, in quibus temporum ordine rescripta locantur. Sed nec illic quisquam huc processit, ut ipsas leges in tabulas redigeret: quae in re theologorum diligentia victi sumus, qui tabellas & analyses suas ad ipsos usque verticulos produxere.

§. 54. *Seriem Summa* sequitur, quae est vel *universalis*, vel *particularis*. *Universalis* omnium juris librorum, nempe Pandectarum, Codicis, Novellarum, Juris Feudalis, Pontificii, Recessuum Imperii simul. Hanc voco Institutiones Juris Universi, quae in eo differunt ab Elementis Juris (§. 22. seqq.) descriptis, quod hic etiam abrogata & vetus jus breviter recensetur, quod & in suis Institutionibus fecit *Justinianus*; illic tantum usu recepta hodierno. Methodus interim eadem esto, quae Elementorum; quod perpetuo observandum censuimus, ne methodorum varietate discentes turbentur, Juris Universi Institutiones qui haecenus composuerit, non recordor.

§. 55.

§. 55. *Summa particularis est vel librorum seu operum, vel titulorum. Summa librorum est varia pro librorum juris varietate. Compendium Institutionum Justinianearum elegans praemittitur in corpore juris Gotbofredi: sed quum ordinem titulorum legumque servet, legum potius in Institutionibus, quam ipsarum Institutionum summa dici debet. Digesta & Codicem separatis aphorismis egregie contraxit Arnoldus Corvinus v.cl. Jus novissimum seu Novellarum in unum collectum est per Gudelinum. Institutiones Juris Canonici confectae primum a Lancelloto privato studio, a cujus morte, accedente approbatione publica, insertae sunt corpori canonico. Exstant & Institutiones Juris Canonici M. Ant. Cuccbi, & Aphorismi Jur. Canonici ejusdem Arn. Corvini. Institutiones Juris Feudalis dedit omnium optime Herm. Vultejus, quas ipsas iterum sub finem in brevissimam synopsin contraxit. Desiderantur adhuc Institutiones Juris Caesarei, seu compendium recessuum Imperii ordinationisque cameralis &c. Desiderantur item Institutiones Juris Saxonici methodice ex corpore juris Saxonico collectae, in quibus conficiendis tamdiu cessatum esse, semper miratus; sed quia dum alius alium exspectat, intermittunt omnes; nos propediem, si Deus adjuverit, tum Caesarei, tum Saxonici Juris Institutiones moliemur, nisi interim aptior aliquis praevenerit. Interea pro jure Caesareo legi possunt, in primis quod processum*

cessum attinet, *Pandectae Camerales Rodingeri*, pro Saxonico vero *Geo. Schulzii Synopsis Institutionum Justinianearum*, quibus loca parallela ex jure Saxonico adjecit.

§. 56. *Summa titulorum*, quae in glossato corpore reperitur, & manca & superflua & inordinata est: quemadmodum & gothofredeae superflua & inordinata, dum legum in titulo ordinem persequitur; manca, dum ponit tantum terminos simplices, non totam propositionem. Optimae in hunc finem sunt *Julii Pacii a Berriga Analyses*, nuper in Belgio auctiores recusae. Nos specimen tituli contracti dabimus tum ex Digestis & Codice, tum ex Novellis. Talis *titulorum summa* omnium maxime necessaria est in Codice & Novellis, in quibus constitutiones a sequioribus Imperatoribus confectae; nam garrulitate, longis proemiis, & nescio quibus rhetoricationibus, lectorem non detinent modo, sed & confundunt.

§. 57. Ex digestis placuit tit. 3. lib. 3. de Procuratoribus, & Defensoribus diffusus per leges 78. brevissimo sermonis genere scriptus: nos tamen, universalia abstrahendo, sic contraximus, ut omnes tituli leges ex nostris regulis liceat derivare. *Procurator* est, qui alterius consentientis negotia administrare consensit. In primis autem h. l. sermo erit de *judiciali*. *Dare* eum potest, cui suis rebus praeesse jure licet (l. 8. 33. 35. §. 1. l. 43. §. 1.) *Dari*, qui non prohibetur (l. 43. pr. §. 1.)
Probi-

Prohibetur in litibus miles, nisi agat nomine sui numeri vel in rem suam (l. 8. §. 3.), femina, nisi pro parentibus in casu necessitatis (l. 41.), duplex pro uno (l. 31. §. 1. 2. l. 33.), unus pro pluribus in ea causa adversis (l. 43. §. 6.). *Constituitur* mandato Domini (l. 27. 47.) cum consensu Procuratoris (l. 1. §. 2. l. 3. 5. 6. 7. 8. §. 1.), vel litis contestatione, post quam fera est exceptio Procuratoria (l. 8. §. 3. l. 40. §. 3. l. 57. §. 1.) in causis civilibus omnibus, nisi exceptis: exceptae sunt actio popularis, quando privatim agentis non interest (l. 42. 45. §. 1. l. 74.), & plerumque famosa (l. 39. §. 7.) Oritur hinc 1) *obligatio Procuratoris* erga Dominum mandati (l. 42.) ad administrandum (l. 15.), & quae consequutus est ex hac causa restituendum (l. 46. §. 4.) erga adversarium ad suscipiendum iudicium, si consentiente ipso Dominus cavit iudicatum solvi (l. 8. §. 3. l. 17.); nisi utrobique necessitate (d. l. 8. §. 3. l. 9. 19. 21.), vel maiore utilitate sua (l. 10. 20.) vel inimicitia cum Domino (l. 14. 21.) vel dignitate (l. 8. §. 3.), vel praesentia Domini liberetur (l. 10. 11.), nisi & his casibus periculum sit in mora (l. 12.): tenetur & adversario iudicati, si in rem suam egit, si se obtulit sciens cautum non esse (l. 61.). Oritur hinc 2) *obligatio adversarii*, ut cum Procuratore, velut Domino, iudicio congregiatur (vide tamen l. 29. 43. §. 5.), si, quum pro actore est, de rato caveat (l. 39. §. 1.), nisi sit ex
li.

liberis, parentibus, fratribus, affinibus, libertis (*l. 35. pr. l. 40. §. 4.*), aut Dominus rata se habiturum gesta ejus testetur (*l. 65.*); aut si pro reo, judicatum solvi (*l. 39. §. 4.*). Porro mandatum ad finem continet *media necessaria* (*l. 36. 62.*), non tamen generale transactionem (*l. 60.*). Oritur hinc quoque *obligatio adversarii vel fidejussorum* erga Dominum, ut utilem in eos actionem habeat (*l. 27. §. 2. l. 28.*), nisi Procurator sit in rem suam (*l. 36.*). Oritur hinc 3) *obligatio principalis erga Procuratorem* mandati (*l. 42. 46. §. 5. 6.*), nisi Procurator qui non est in rem suam ex necessitate (*l. 33. §. 5. l. 34. adde l. 79.*) defendere recusavit (*l. 33. §. 4. l. 55. pr. §. 2. in primis l. 43. §. 4.*) *Defendere* potest quivis (*l. 34. §. 2.*), convenibilis facile (*l. 54.*), cum tuto effectu (*l. 51.*) absentem (*d. l. 34. §. 2. l. 64.*), si de rato caveat (*l. 39. §. 7. l. 40. §. 2. l. 76.*), & satisdet judicatum solvi (*l. 28. 46. §. 2. l. 53. 76.*); posterius si fecit, etiam cogitur defendere (*l. 43. §. 5.*): nisi intercedat causa, quae alias a Procuratore liberat (*l. 43. §. 6. l. 44.*): defendere autem est eandem vicem cum reo subire (*l. 35. §. 3. l. 51. §. 1.*). *Finitur procuratio* excusationibus Procuratoris, de quibus supra; a Domino vero libere ante litem contestatam (*l. 16.*), tum aliis modis, tum si alium postea, vel simul in solidum praevenientem dedit (*l. 31. §. 1. l. 32.*); lite contestata non nisi decreto Praetoris, ob eas causas, quibus alias se Procurator excusat; item ob
in-

suscipionem (*l. 17. seqq. usque ad l. 27.*): plane autem removere Procuratorem non potest, si in rem suam est, vel retentionis jure utitur (*l. 25.*).

§. 58. Ex Codice delegimus titulum 50. *lib. 6. de Caducis Tollendis, & rerum difficultate, & multiloquentia Justiniani oneratum. Hujus nucleum (reliqua enim verborum sunt cortices) sic extraximus. Si relicta a defuncto (§. 14.) deficiant, id est, fiant impossibilia, morte nempe honorati, vel defectu conditionis; nam quae ab initio seu tempore testamenti conditi talia sunt, pro non scriptis habentur; fit hoc vel vivo testatore, quae olim *in causa caduci* esse, vel mortuo, antequam dies relictī cedat, quae proprie *caduca* dicebantur: jure veteri dies cedebat non nisi apertis tabulis (haec ex §. 2.), at Justinianus constituit, ut morte testatoris, nisi quod in diem incertam relicta, cedant existente demum die (§. 7.). *Hereditas* eorum qui sui non sunt (§. 5.) & libertates (§. 6.) *aditione*, quam Justinianus & ante apertas tabulas admisit (§. 1.) Ceterum jure veteri lege Papia Poppaea sub Augusto *caduca* redigebantur in fiscum, exhausto bellis aerario (*pr. §. 1.*): sed Justinianus, quae *pro non scriptis, in causa caduci, & caduca* dicebantur, omnia jussit ad substitutum vel conjunctum venire (§. 3. 4. 5.); ad substitutum & verbis conjunctum & coheredem cum onere (§. 11.) personae non affixo, sed vicarii patiente*

tiante (§. 9.), ad coheredem vero & necessario si coheres esse velit, & pro portione non ut alias virili (§. 11.), sed hereditatis (§. 10.); ad re conjunctum sine onere (§. 11.), sed praefertur ei verbis conjunctus (§. 10.); His deficientibus manent apud eum, a quo relicta sunt (§. 8.); & hoc quoque deficiente, demum cedunt fisco (§. 13.)

§. 59. Ex Novellis contraximus tertiam de Monachis. *Monachus* esse quivis potest, si triennium in Monasterio fuerit sine vestitu Laicus, ut appareat an ipsi Monasterium, & contra, placeat: sed servum ob scelera in Monasterium fugitivum Dominus retrahere hoc tempore potest (c. 2.) Triennio elapso Monachus *esse incipit*, & bona, quae quis tum habuit, fiunt Monasterii (c. 6.), ita tamen ut quarta ad liberos perveniat. (c. 5.) *Monasterium* aedificatum sic consecrabitur: Episcopus tollat manus ad coelum, locumque oratione & signo crucis consecret (c. 1.). Monachi coenobiorum unum habeant *cenaculum* & *dormitorium* (c. 3.). *Abbas* ex Monachorum grege ab Episcopo eligatur (c. 9.). Monachus *esse desinit*, qui voluntarie redit in saeculum; sed poenae loco inter officiales judicis provinciae statuetur (c. 6.): item qui uxorem ducit, quod ei licet; qui cantoris, & lectoris gradum non excessit; sed poenae loco ab officiis & militia excludetur (c. 8.) *Transitus* autem de Monasterio in Monasterium plane prohibetur (c. 17.).

G

§. 60.

§. 60. *Paratitla* sunt systema legum ad eandem materiam pertinentium ex variis titulis contractarum. Talia *paratitla* non habent summae rationem, sed ipsis interdum legum libris magnitudine non cedunt; suntque aut *universalia*, aut *particularia*. *Universalia* sunt, quae ex toto corpore juris sunt, qualia pauca esse arbitror. Omnium tamen maxime quadrant huc *Hug. Donelli* Commentarii Juris Civilis, & *Nic. Vigelii* Methodus Juris Civilis, utilissimus liber & ordinatissimus. *Particularia paratitla* sunt *VVesembecii*, *Cujacii* super Digesta & Codicem separatim, & diligentissimum *Mejeri* Collegium Argentoratense super Digesta tantum, quod tamen non minimam partem Vigelii vitula exaratum est. In Codicem habemus *Peresium*. *VVesembecio* *Bachovius*, *Habniusque* supplementa adduxerunt. Nolo enumerare innumerorum prope similes curas; quia eos tantum nominare certum est; quibus utendum suaserim.

§. 61. Sequitur *interpretatio solitaria* ipsius textus, cujuslibet pro se, seu commentarii. Tales ad Instituta sunt innumerabiles vel freto danico sternendo suffecturi: commendantur *Hottomannus*, *Balduinus*, *Bachovius*, *Vinnius*, *Ludovellus*; sed si verum amamus, recte *Cujacius*, Institutiones vix interprete indigere, nisi breviusculo marginali & mere textuali adnotatore; quemadmodum parvula editione, tum *Crispini* & *Pacii*, tum etiam *Arnoldi Vinnii* factum est.

§. 62.

§. 62. Super Digesta Codicemque habemus grandes commentarios veterum, *Bartoli*, *Baldi*, *Jasonis*, *Decii* &c., in quorum sercore multa latent aurea sagaci ingenio eruenda. Restaurata eruditione prodire adnotata *Budaci*, *Zastii*, *Duareni* ad plerasque leges. *Cujacius* alia via collegit in unum unius alicujus Jurisconsulti responsa, & super eum commentatus est, ut super *Paulum*, *Papinianum*, *Modestinum* &c. Posteriores raro sunt textuales, sed vel *paratitulis* vel *controversiis* exercentur, nisi quod nuperissime *Dn. Brunnemannus* v. cl. egregio diligentiae exemplo omnes Codicis leges ordine est persequutus, idemque in Digesta promittit. Ceterum effecit diligentia *Dion. Gothofredi*, viri immensorum in Romanam Jurisprudentiam meritorum, quod de eo elogium est (*Casp. Barthii*), ut commentariis novis textualibus vix indigeamus: ille enim pleraque tum glossatorum, commentatorumque veterum, tum eruditissimorum superioris aevi hominum observata mirabili diligentia congeffit. Unde non tam decebat novos commentarios cudi, quam supplementa mitti. Gothofredo ex Jurisconsultis in primis hujus saeculi, quod & in batava editione corporis Gothofredi factum titulus promittit. Sed nec illud laudo, quod aliorum observationes novis Gothofredi interuntur editionibus; ita enim aut priores fiunt inutiles, aut posterior habenti priorem non emitur. Decebat potius, ad imitationem

Florum Sparforum *Hug. Grotii*, separatim, velut supplementa Gothofredi, ordine textuum imprimi, quae in eo non existent. Antequam hinc abeam, observandum est, quum in ceteris theologi nos vicerint, Dion. Gothofredum effecisse, ut aliquando saltem superiores simus: neque enim tales perpetuas marginales ad Scripturam notas tam plenas simul & breves umquam habuerunt. Incepit aliquid in Nov. Test. *VValaeus*, sed multum a fine abest. Sed contra habent illi *Biblia numerata*, ex quibus in primis manuscripta dorseheana in multorum hodie manibus versantur: nos vero *leges numeratas*, id est, in quibus singulis adnotentur auctores, qui eam legem, vel titulum, vel librum explicauerunt, nondum habemus; nisi quod magnus vir Dn. *Marci*, Cancellarius Martisburgensis, & senior scabinatus lipsiensis, *Codicem numeratum* possidet.

§. 63. *Interpretatio* autem alicujus textus est vel *realis*, vel *textualis*. *Realis* est, quae elicit certas propositiones ex lege, easque absolute tractat, *probando & obiiciendo, objectionesque solvendo*, si ita videtur: illic legem offensive, hic defensive propugnant. *Probatio* fit per *auctoritates & rationes*. *Auctoritates* sunt leges aliae seu loca parallela, item opiniones doctorum, tamquam auctoritates universales: particulares sunt historiae, seu res judicatae in variis dicasteriis, quo pertinent & consilia. *Obiectio* fit iisdem modis; leges autem obstantes in specie con-

con-

constituunt antinomiam. *Rationes* utrobique pro & contra variae sunt.

§. 64. *Interpretatio textualis* est κατὰ νόμον (a) ad legis verba; & vel *totalis* ad totam legem, vel *partialis* ad singula verba. *Totalis* agit de connexionione legis cum aliis legibus, summa & partitione legis, de auctore & historia legis, & occasione qua lata est. Quo pertinet *inscriptio* & *subscriptio*, quarum illa auctorem, haec locum & tempus complectitur. Ad historiam pertinet & enarrare, quid ea lege profectum sit, quamdiu duraverit, quid alioqui circa eam notabile acciderit, quomodo aliquis veterator ea callide sit abusus. Quo pertinent alia memorabilia: v. g. ubi in legibus recensentur tria juris praecepta, *boneste vivere, neminem laedere, suum cuique tribuere*, adnotari potest acutum illud dictum Barclaii in Euphormione, *maliri se*, ille ait, *catalogum legum abrogatarum, in quibus has tres primo loco positurus sit*: item ubi in legibus dicitur, *licere servo in corpus suum saevire*, ex quo nonnulli probare volunt autochiriam jure Romano esse licitam; ibi adnotari potest, insignem aliquem virum Noribergae non multis ab hinc annis theologo moerorem suum melancholicum solanti objecisse textum hunc, & licentiam αὐτοχυρίας (b) probare voluisse, quumque theologus nihil ad textum responderet, sed aliud jure divino & naturali dictari diceret, confirmatus

G 3

illo

(a) *Omnino accedendo.*

(b) *Cacdis sui ipsius.*

ille in sententia, mortem sibi paulo post conscivit.

§. 65 Et haec de *interpretatione totali*. *Partialis* consistit in *textu constituendo*, & *constitutum explicando*. *Constitutio textus* absolvitur variis lectionibus, & arte critica in specie sic dicta; de qua insignis exstat commentatio *Scioppii*, in qua regulae traditae sunt constituendi textus. *Constituti explicatio* est vel per aliam linguam necessario seu versionem, vel per quamlibet. Versio legum nostrarum graeca ad interpretationem multum facit; graeci enim paraphraetae & scholiastae vetustiora nostris exemplaria habuere, historiasque legum accuratius pernovere: unde versio Institutionum *Theophili* valde commendatur. *Basilica* vero sunt graeca quaedam reliqui juris versio; ut de Novellis nihil dicam, quarum textus originalis est graecus ex quibus collectae sunt Authenticae per *Irnerium*, ut vulgo putant; sed contrarium ostendit magnus Jurisconsultus Dn. *Job. Strauchius* in diss. *Irnerius non errans*, quam *VVisembeckii* erroribus *Irnerii* opposuit. Germanicam juris versionem dudum moliti sunt egregii viri, & promovit valde institutum *Ernestus Princeps Saxo Gothanus*, pietate ac prudentia inclytus: difficilis labor, in primis in Digestis ob inimitabilem prope styli in tanta simplicitate brevitatem. Sed quoties velocissimos historicorum eisdemque acutissimos sententiis *Sallustium* ac *Tacitum*, non incommode Germanos factos cogito; apparet rem

rem vastam magis quam arduam esse, praesertim quum terminos juridicos latinos plerosque satis bene germanicis expresserint Speculum vetus Saxonicum & Suevicum, Recessus Imperii, & hodiernus curiarum stylus. Et scio in celeberrimis quibusdam dicasteriis studio caveri, ne qua sententiis vox latina inferatur.

§. 66. *Interpretatio per linguam quamlibet; sive eandem sive diversam, vel sensum explicat, & dicitur paraphrasis, vel artes dicendi ad verba applicat, & dicitur analysis. Paraphrasis ita se habet ad orationem, uti definitio ad vocem neque enim ad paraphrasin sufficit, ut fiat per verba synonyma, nisi fiat per clariora. Huc pertinet inter alia casus formatio, ob quam Accursius merito commendatur. Ceterum praecepta verum sensum eruendi (hic enim potissimum est exegeticae jurisprudentiae finis), diffusa sunt admodum, de quibus diligentissime Justus Braven in Commonefactione Logica per Gerb. Boddenium, & Bernard. Gosmannum, Rostochiae edita; ubi sub specie tradendae logicae nihil aliud, quam ars hermeneutica, specialissime, sed breviter nimis ac sine exemplorum luce deducitur. De eadem re accurate admodum auctor anonymus arminianus, ut videtur, in Philosophia Scripturae Interprete nuper in Belgio edita. Nec spernenda, quae Steph. de Phedericis in lib. de Ratione Interpretandi Leges, & Alciatus in libris de Verborum Sign. tradidere. Consuluntur quoq.; non inutiliter Rhetores, ubi*

de genere judiciali *περί ρήτῶ καὶ διαβολῆς, περί ἀντι-
νομιῶν* (a), aliisque locis affinibus, docent.

§. 67. Mihi breviter hermeneuticae totius
fons sic aperiri posse videtur. *Paraphrasis*, ut
diximus, est ita ad orationem, uti definitio
ad vocem. Ad faciendam igitur *paraphrasin* seu
ad interpretandum, ponantur primum omnium
vorum definitiones: quumque una vox possit
esse homonyma, seu habere definitiones varias;
tentetur cum quibus combinari possit, seu quot
fieri possint combinationes definitionum in unam
paraphrasin utiles, seu quarum singulae possi-
biles sunt: inutiles reiiciantur. Ut vero haec-
nus retentis verae eligantur, fiat porro combi-
natio cum verbis antecedentibus & consequen-
tibus, locis parallelis, historia, loco, tempore
ratione; quia in dubio auctor, nisi alia id pro-
bent, praesumitur non errasse: & si auctor est
sacer, certum est eam interpretationem reiicen-
dam, quae cum ratione & historia, seu cum
veritate pugnat. Fiat item, & quamprimum
quidem, applicatio ad mentem auctoris, affe-
ctus, ingenium, voluntatem: v. g. *prudens*,
non praesumitur ineptum aliquod & frustraneum
neque exitum habens, in testamento constituisse:
unde semper actus interpretandus, ut valeat po-
tius, quam infirmetur. Item interdum mens est
auctoris obscure loqui, explicare interdum: ob-
scure

(a) *De litt. & sent., de legum inter se repu-
gnantia.*

seuro v. g. dedita opera loquebantur oracula; veteres pythagorici, auctores aenigmatum, philosophi chymici: quoties hi explicandi sunt, fugiendus sensus obvius. Attendatur item ad accentum loquentis, manum scribentis: Quod si vero his complicationibus fiat, ut nulla denique *paraphrasium* tolerari possit, ibi necesse est transponi litteras, & quaecumque sunt artis steganographicae vel cryptographicae praecepta observari, an corruptus sit textus vel distinctio, an non voces traiciendae, an non aliquae omisae vel superfluae; adhibendique alii tropi seu immutationes probabiles & possibiles non jam dictionis, sed orationis. Quod si jam nulla *paraphrasis* seu sensus est tolerabilis, oratio dicitur obscura; si vero multae simul, ambigua: plerumque tamen una aliqua ex combinationum cum circumstantiis capite est probabilior. Ex quo patet breviter, fontem hermeneuticum esse duplicem, 1) *combinationem variarum cujusque dictionis, phraseos, commatis, periodi inter se & cum circumstantiis*; ut appareat, quae possibilis, & si plures possibiles, quae probabilior: 2) *si vero nulla tolerabilis significatio illa combinatione emergat, levem ac probabilem immutationem seu tropum orationis interpretandae*.

§. 68. *Analysis* est applicatio regularum aliqujus ex artibus dicendi ad orationem praesentem; estque *Grammatica, Rhetorica, Logica*. *Grammatica* voces in se, earum orthographiam, pro-

profodiam, etymologiam, syntaxin, distinctiones ad syntaxin pertinentes, ejusque velut signa, uti accentus signa sunt profodiae, persequitur. Voces autem in se quum considerat, enarrat earum significationem, derivationem, apposita, epitheta, opposita, synonyma, periphrases (vid. supra §. 43. 44. 45.). *Analysis rhetorica* est troporum dictionis, orationis schematum, omniumque, de quibus supra (§. 46.), motorum item affectuum. *Analysis logica* est occurrentium definitionum, divisionum, propositionum, syllogismorum, ordinis, & singulorum non solum ratione inventionis seu locorum, ex quibus sumpta sunt, sed & ratione judicii seu maximarum, ad quas exigenda sunt, consideratio. Non mirandum est, hic quaedam recurrisse supra in philologia juris monita; quia illic ex variis textibus colliguntur, hic ad unum textum adnotantur. Quemadmodum in Antinomico colliguntur omnes antinomiae, in singulis tamen textibus fusius & separatim solvendae, ut ex illo in textum saltem digitus intendi possit. Et ita in universum in philologia juris & philosophia aequum est loca legum saltem allegari & colligi, non vero singula fusa tractari, quod ipsi textui reservandum.

§. 69. Ita omnes *interpretationis* fontes breviter, sed dilucide, ut spero, & profunde (claritate enim & altitudine fontes commendantur, magnitudo ex iis vel lacus vel amnes efficit)

ficit) aperuimus , iisque , ut spero , facem praeluximus , qui philosophia levius tincti ad textum aliquem explicandum , ut academiarum mos est , accedunt ; nam vulgare carmen ,

Praemitto , scindo , summo , casumque figuro

Perlego , do causas , connoto , & obiicio ,

quo in textibus explicandis vulgo utuntur , in nostram methodum resolvitur. *Praemitto* pertinet ad interpretationem textualem totalem (§. 63.), *scindo* ad analysin logicam (§. 67.), *summo* est species interpretationis simultaneae (§. 53. seqq.), *casum figuro* ad paraphrasin (§. 65. 66.), *perlego* ad analysin grammaticam , rhetoricam (§. 67.), *do causas & obiicio* ad principalem textus propositionem , *connoto* ad secundarias ex textu propositiones , utrobique interpretatione reali (§. 62.). Nunc admoneamus coronidis loco , quando quibus ex his fontibus utendum sit : & arbitror *analysin logicam , grammaticam , rhetoricam* , tum demum quum aliquod singulare & observatu dignum occurrit , adhibendam ; nam specialior omnium analysis ad informationem puerorum pertinet , qui vulgaria etiam grammaticae , logicae , rhetoricae praecepta adhuc imbibere debent. Et optandum , ut illi , qui Jurisprudentialiae praeparantur , etiam grammaticam , logicam , rhetoricam ex libris juris discerent ; theologi ex Bibliis Castellionis , libris ecclesiae cujuslibet symbolicis ; medici ex Galeno , Celso & recentioribus quoque , quia & illorum stylus spernendus non est. De *interpretatione reali* distin-

stinguendum: vel enim commentarius scribitur super textum tantum, v. g. *Beuff.* ad l. admonendi de Jurejur., *Del Rio* ad l. transigere, *Jac. Gothofredi* ad l. Rhodiam de Jactu, *Richieri* ad auth. habita, C. ne Filius pro Patre; quo casu permissum est ob inopiam alioqui dicendorum effundere se in materiam, quae in textu continetur, eamque absolute & realiter tractare: talem interpretationem quondam dicebant *solemni apparatu* factam: vel commentarius scribitur super totum librum, quo casu propter multitudinem alioqui dicendorum tantum permissum est propositiones ex textu elicere, & controversias, quae occasione textus moventur, adnotare. Sed ratione propositionum permessa est tantum probatio per locorum adductionem, & defensio per locorum obstantium solutionem. Ratione vero tam propositionum, quam controversiarum licitum est interpreti tantum remittere Lectorem ad auctores, qui quaestionem absolute, & realiter tractarint; exceptis controversiis de sensu legis, quae proprie ad munus interpretis spectant, & ab eo accurate sunt pertractandae. Antinomiae solutio fiat ad eam legem, quae inter pugnantes maxime obscura est, & sedes difficultatis; in altera fiat tantum ad illam remissio.

§. 70. Ita tandem *Jurisprudentiae exegeticae* pelagus emensi sumus; sed videmur nobis ad fretum gaditanum pervenisse, ubi ex mediterraneo mari in Oceanum transitus panditur: *Juris-*

ris-

risprudentia enim *polemica* ita infinitum diffusa est, ut exhauriri non possit; novi enim quotidie casus emergunt. Interea danda Jurisconsulto opera est, ut cognitas saltem regiones lustret, id est, casus jam ventilatos colligat & decidat: ita quum ad nova littora tempestate deferetur, id est, in novos casus incidet, ope magnetis, id est, Juris naturalis, facile se explicabit.

§. 71. Dicemus autem tum de *principiis decidendi*, tum de *collectione decisionum*. *Principia decidendi* sunt ratio ex jure naturae, & similitudo ex jure civili certo: nam si accurate rem consideremus, omne jus civile magis facti est, quam juris; quia probandum est non ex natura rerum, sed ex historia seu facto: probandum enim est legem esse promulgatam, consuetudinem introductam; deinde probandum etiam est, qui legem tulit, ejus rei potestatem facto & pacto sibi adquisivisse. Unde patet, legem ex conventionione populi valere (a). Quumque certi juris sit, in iis, ubi pactum non intercessit, obtinere jus merum; patet in iis casibus, de quibus lex se non declaravit, secundum jus naturae esse judicandum; quemadmodum in casu cessantium statutorum judicatur secundum jus commune. Si observarent hoc decisionarii, facilius se extricarent: verum illi ad similes potius materias jure civili decisas respiciunt, &
ex

(a) *In democratia & aristocratia, ex Principis placito in monarchia.*

ex illis ad has argumentantur, quae res illi magnam perplexitatem parit; sunt enim plures uni similes, & unus ad hanc, alius ad aliam similitudinem confugit: ideo tutius arbitror, referre se ad merum, immutabileque jus naturae. Et perinde mihi videtur, ac si quis, quae in statutis passim de equorum evictione placuerunt, velit & ad asinos trahere; ad mulos tamen trahi an possint, dubium est, & puto non posse: mulus enim magis est asinus quam equus; quia partus sequitur ventrem, mater autem est asina. Confugiendum tamen nonnunquam ad alias leges civiles similes, vel *ex verbis*, vel *mente legislatoris*. *Ex verbis*, quando legislator vel *semel in universum*, vel *in certa materia* declaravit se hoc velle. *Semel in universum*, v. g. in jure Saxonico longa consuetudine dicasteriorum receptum est (qui mos valet pro lege) casus dubios decidendos potius ad similitudinem aliarum legum Saxonicarum, quam juris communis. *In certa materia*, v. g. jure civili cautum est, ut quae de viris dicuntur eadem de feminis intelligantur, nisi singularis lex vel ratio impediatur. *Ex mente legislatoris*, quoties eadem ratio subest: v. g. jus Saxonicum vetus dicit, *der pfaß nebm gerade*: quaeritur jam, an Canonici sumant *geradam*, qui proprie non possunt dici *pfaffen*; quia eos Sacramentum Ordinis accipere necesse non est; & respondendum est; sumere illos quoque per rationem legis; quia *gerada* in compensationem
iis

iis data est, qui non sunt capaces suppellectilis castrensis, *des heergeraethes*, quales sunt feminae & Ecclesiasticae personae; Canonicis enim interdictum bellum esse inde patet, quia effuso sanguine humano contrahitur irregularitas; qua tollitur praebenda. Quum igitur duo sint *principia decidendi*, jus naturae & lex similis, & a materia una ad aliam valere argumentum, quoties siluit legislator, non aliunde constet, quam ex similitudine rationis, ratio autem legis pendeat ex politicae illa parte, quae dicitur *nomothetica*; apparet Jurisconsulti in dicasterio sedentis duos oculos esse *scientiam juris naturalis*, & *scientiam nomotheticam*: quemadmodum casus jam tum decisi per *historiam* retro actorum, & *exegefin* legum cognoscuntur, de quibus supra.

§. 72. *Juris naturalis* non minutissima quaeque, sed principia tantum persequemur, eaque primum ex sententia aliorum, deinde & nostra. Alii qui circa jus naturae philosophati sunt, videntur esse hi potissimum, *Plato, Aristoteles, Epicurus, Cicero*, & temporibus recentioribus *Hugo Grotius, Sfortia Pallavicinus, Tb. Hobbes, Job. a Felde, Rob. Scharrok*. *Plato* passim *Juris* fundamentum statuit τὸ κοινὸν συμφέρον (a). In libris de Republica *Thrasymachus* disputat, justum esse potentiori utile. *Aristoteles* & cum eo *Stoici* statuere *juris naturae* esse fundamentum naturae convenienter vivere; & quidquid natu-
rac

(a) *Publicam utilitatem.*

rae rerum, id est, statui earum optimo & perfectissimo conveniat, id justum esse: *Epicurus* statuit juris naturae esse, quidquid mihi revera utile, quidquid nempe producit voluptatem animi & tranquillitatem mentis. *Cicero* in libro de Officiis & alibi, eo in primis utitur fundamento, neminem sibi soli natum, partim patriam, partim parentes, partim amicos sibi vindicare.

§. 73. Recentiores ita tradunt. *Hugo Grotius*, juris naturae esse, quidquid convenit cum natura societatis ratione utentium, seu quidquid cum societate compatibile est: sumit igitur quod ab *Hobbio* negatur, hominem esse natura socialem *Sforzia Pallavicinus* in libro eleganti de Bono, post multas disceptationes ita statuit, justum esse quidquid naturae placet: naturae autem nomine intelligit principium motus & quietis in mundo, quod necesse est sapiens esse, quia motus tam pulcher ordinatusque est. *Th. Hobbes* in subtilissimis de Cive Elementis sic procedit: Statum hominum esse vel extra superiorem, vel sub superiore seu in civitate; illic esse jus merum omnium in omnia seu jus belli: sed quum status belli sit exitiosus, teneri quemlibet sana ratione duce, ut se disponat ad pacem seu statum in una civitate, quantum in se est: constituta autem civitate, simpliciter juris esse quidquid civitati placuit, neque aliud ibi naturae jus obtinere. *Job. a Felde* in Elementis Jurisprudentialis principia Aristotelis reduxit & expolivit. *Rob. Scarrok* in lib. de Officiis secundum

§. 74. Hos facile inter se conciliabimus, explicata nostra sententia. Scilicet *juris naturae* tres sunt gradus, *jus strictum*, *aequitas*, *pietas*, quorum sequens antecedente perfectior, eumque confirmat, & in casu pugnantis ei derogat. *Jus strictum* seu *merum* ex terminorum definitione descendit, & est, si recte expendas, nihil aliud quam jus belli & pacis; nam inter personam & personam tamdiu est jus pacis, quamdiu alter non incepit bellum, seu laesit. Inter personam autem & rem, quia res non est intelligens, perpetuum est jus belli; & licet leoni hominem discerpere, & monti hominem ruina opprimere; contra homini frenare leonem, perfringere montem: victoria autem personae super rem rei que captivitas, dicitur possessio. Possessio igitur dat personae jus in rem jure belli, dummodo res sit nullius: nam si res est alicujus, non magis illam

H. lac-

(b) Repugnancia ob contrariam affectionem.

laedere, aut auferre licet, quam alterius servos occidere, aut alterius perfugas recipere. Si igitur alterum alter vel in persona, vel rebus suis laesit, dat ei jus quod habet in rem, seu jus belli. Est autem & inter laesionis species deceptio perniciosa, qua damnum datur menti, ex quo descendit servandorum promissorum necessitas. Ex quo patet *juris naturae meri* unicum praeceptum esse, *neminem laedere*, ne detur ei jus belli: huc pertinet justitia commutativa, & jus, quod *Grotius* vocat facultatem.

§. 75. *Aequitas* seu aequalitas, id est, duorum pluriumve ratio vel proportio, consistit in harmonia seu congruentia; & coincidit cum principiis *Aristotelis*, *Grotii*, & *Feldenii*. Haec requirit, ut in eum qui me laesit, non bellum internecinum instituam, sed ad restitutionem arbitros admitti; quod tibi nolis, alteri non faciendum; item ut puniatur non tam imprudentia, quam dolus & malitia; item ut infirmetur contractus subtiles, & circumventis subveniatur. De cetero *jus strictum* observari ipsa *aequitas* jubet. Huc pertinent *Hobbii* dispositiones ad pacem. Sed *aequitas* dat solum jus laxè dictum, seu, *Grotii* stilo, aptitudinem uni, alteri vero obligationem plenam: v. g. aequum est, ut qui dolosis subtilitatibus se a meo debito liberavit, mihi nihilominus teneatur: sed mihi non datur in eum actio persequendi; actio enim, vel exceptio, vel quaecumque postulatio ex *jure mereo* descendit, nisi aliquid lex addat: ille tamen-

tamen est obligatus, ut mihi det. Hinc illud praeceptum, *suum cuique tribuere*. Sed lex aut superior dat aequitati exitum, & ex ea nonnunquam actionem vel exceptionem tribuit.

§. 76. Tertium juris principium est voluntas superioris. Et huc quae Trasymachus apud Platonem supra dicebat, justum esse potentiori utile. Superior autem est vel natura Deus, ejusque voluntas iterum est vel naturalis, hinc pietas, vel lex, hinc jus divinum positivum; vel superior est pacto & facto, ut homo, hinc jus civile. *Pietas* igitur tertius est gradus *juris naturae* tribuitque ceteris perfectionem & effectum: nam Deus, quia omniscius & sapiens est, *jus merum* & *aequitatem* statuit & confirmat; quia omnipotens, exequitur. Hinc coincidit utilitas generis humani, immo decor & harmonia mundi cum voluntate divina. Ex hoc principio jam ne bestiis quidem & creaturis abuti licet. Huc reducuntur meditationes *Sforziae Pallavicini*. Ex hoc fundamento ne se ipso quidem abuti licet, quia nos ipsimet sumus Dei, cui omnipotentia tribuit jus in omnia. Hinc illud praeceptum, *honeste vivere*. Quumque *jus strictum* & *aequitas* careat vinculo physico, Deus, accedens efficit, ut quidquid publice, id est, generi humano & mundo utile est, idem fiat etiam utile singulis; atque ita omne honestum sit utile, & omne turpe damnosum: quia Deum justis praemia, injustis poenas destinasse, ex ejus sapientia constat; & quae destinavit, perfecturum, omnipo-

H. 2. (en-

tentiae ratio evincit. Existencia igitur entis alicujus sapientissimi & potentissimi, seu Dei est *juris naturae* fundamentum ultimum; quae a nobis mathematica certitudine demonstrata quum prodibit in publicum, disjectura est penitus nebulas ab atheis veritati offusas.

§. 77. Alter Jurisconsulti in casibus decidendis oculus est *nomothesia*, cujus principium utilitatis Reipublicae, quae ita est ad Rempublicam, uti *pietas* ad mundum & Rempublicam universalem. De *nomothesia* praeclare differuere *Hopperus* in *Seduardo*, *Conringius* tum in praefatione *Hopperi*, tum in *Civili Prudentia & Propolitico*. Consistit autem salus populi, supremae Reipublicae lex, in bono ipsorum civium tamquam materiae, & conservatione regiminis tamquam formae: nam & *Lipsius* duo ait inspicienda, naturam populi, & naturam regni; quod commendat *Boeclerus* in *diff. de Politica Lipsiana*. Bonum regiminis consistit in jure publico, & tali ceterarum quoque legum formatione, ut mutatio praecaveatur. Bonum civium consistit in *ὑδαίμονι* (a) & *εὐτακείᾳ* (b) quoniam egestas homines non solum ridiculo, ut ait *Poeta*, sed improbos facit. Ad *εὐδαίμονιαν* (c) pertinent omnes ordinationes politicae, in primis quibus educatio & conversatio, tamquam principia malorum & bonorum morum

(a) Bonis animi.

(b) Bonis fortunae.

(c) Bona animi, seu virtutem.

morum; formantur; item praemia virtutibus, poenae vitiis. Ad εὐταρίαια (b) pertinent leges de commerciis, manufacturis, sumptuariae &c. Ad utramque simul pertinent leges, quae jus privatum & judicia formant; nam si cuilibet jus suum tribuitur, evitantur peccata retinentium, & paupertas amittentium. Danda autem opera, non solum ut cuilibet jus suum tribuatur, sed & cito, quo pertinent *ordinationes processus*. In his omnibus praeclarae sunt meditationes *Octav. Pisani* in *Lycurgo*, qui docuit, quomodo formata conversatione & educatione in ipsa radice possint evelli scelera; & quomodo, si omnia coram Magistratu auctoritate publica gerentur, consignenturque libris publicis, ut *Venetis* in banco, possint evitari processus. Sed huc perfectionis non veniemus; det tamen Jurisconsultus operam, ut ad eam, quantum potest, accedat.

§. 78. Haecenus diximus de *principiis decidendi*, dicamus nunc de *collectione decisionum*, seu *controversiarum*: ubi facilius res dictu est, quam in *exegetica*; sed difficilius factu: nam non tam multa publica sunt, nec tam multi conficiendi libri, sed quo pauciores, tanto grandiores. *Collectio controversiarum* est, vel *brevis*, vel *diffusa*. *Collectio brevis* videamus quomodo fieri debeat, & quomodo facta sit. Fieri debet libro, qui vocari potest *Breviarium Controversiarum*; quale est in theologicis *Manuale*

H 3

Br-

(b) *Bona fortunae.*

Becani, aut *Breviatium Huselmanni*. Breviarii Juridici videamus *materiam & formam*. *Materia* consistit in quaestionibus 1) *dubiis*; ita excluditur pars didactica, ea nempe quae legibus expresse decisa sunt: 2) *juridicis*; ita excluduntur philologicae, philosophicae: 3) *hodiernis*; ita excluduntur abrogatae: 4) *rariores*, quoque *poneddis* infra explicandis reservantur; ponendae enim hic sunt illustriores, dissensionibus nobilitatae.

§. 79. *Forma* consistit in *ordine*, & *modo tractandi*. *Ordo* sit idem, qui *Elementorum* (§. 2. seqq. usque ad §. 26.), & *Institutionum* (§. 54.) *Modus tractandi* consistit in *rationibus dubitandi & decidendi*. Utrobique allegentur tantum loca *Elementorum* & *legum*, quae vel *obstare*, vel *pro nobis esse* videantur: *Elementa* enim ita comparata esse debent *more mathematico*, ut ex iis omnes quaestiones possint decidi. Et quemadmodum *Isaacus Barrovi* in sua *Euclidis* editione cantabrigensi certis signis *brachygraphicis* utitur; ita h. l. si argumentum ex *textu Elementorum* vel *legum* sit a simili, *contrario*, *causa*, *effectu*, *genere*, *toto*, *parte*, *alioque loco topico*, pro quolibet sit certum *signum*: ita qui *textum* *evolvat*, & *signum* *intuebitur*, *vim argumenti* facile *perspiciet*, eoque ipso *ingenium* *exercebit*, nec quidquam *brevitas* ei *officiet*. Sed haec aliquando *exemplo* *magis* & *factis*, *confesso* *tali Breviatio*, quam *nunc verbis* ostendemus: v. g. pro loco
a con-

a contrario esto signum \backslash , a simili $()$, a causa $O \text{ —}$, ab effectu $\text{—} O$, a genere \frown , a specie \smile , a toto \supset , a parte \subset . Et quoties duae leges vel duo loca Elementorum conjuncta demum vim concludendi ostendunt, ibi potest adhiberi signum \dagger , v. g. *l. 20. D. V. O. t. l. 10. D. de leg.* Ex auctoribus vero citentur ii tantum, qui quaestionem praeclare tractarunt, & argumenta pro & contra plurima firmissimaeque collegerunt; item qui plurimos alios citant.

§. 80. Diximus, quomodo *collectio controversiarum brevis* fieri debeat; videamus, quomodo facta sit. Et sane habemus multorum libros exercitationum, controversiarum, decisionum, resolutionum, quaestionum, disputationum; sed qui scopo nostro accommodati sint penitus, si verum amamus, nullum: nam si quaestiones philologicas, v. g. de origine & usu vocabulorum; historicas, v. g. de titulis Imperatoris Justiniani, de legum auctoribus, tempore, &c.; philosophicas de definitionum, divisionum, methodi rectitudine; physicas & ad factum pertinentes, v. g. de partu octimestri, de notis virginitatis, de purgationibus vulgaribus; item vetustate abolitas, quid Justiniani, Theodosii, Constantini aevo in usu fuerit, demas; saepe dimidius liber & ultra simul auferetur. Quid autem opus tantopere his rebus occupari, quae substantiam juris non ingrediuntur? aut quid opus tantopere abolita

jura curare, nisi veremur fortasse, ne aliquando, revolutō anno platonico, sub Arcadio, Honorio, & Justiniano Judices, Assessores, Antecessores, & Advocati fiamus? Quos igitur potissimum commendem, non invenio; eligant, ut cuique placet, *Forsterum*, *Sutbold*, *Ludvvellum*, *Treutlerum* curis *Bachovii* & *Hunnii* nobilitatum, Resolutiones ipsius *Hunnii*, *Hackelmanni* Quaestiones Illustres ad allegandos in primis auctores accomodatas. Nihil de *Arumaeo*, *Fomanno*, *Locamero*, ceterisque dicam, continua exscriptione eandem ferram reciprocantibus. Ut taceam, esse auctores plerosque mixtos, ut praecepta, exegefin, historiam, controversiasque conjungant, in quibus cl. *Struvii* Syntagma commendatur. In primis vero cl. viri *Job. Strauchii* proto syndici h. t. Brunsvicensis Dissertationes placent, quibus ille, deserta methodo Justiniana, naturalem sequutus est, & elementa a controversiis typorum forma separatim. Hunc ego cum *Ludvvello*, ac *Treutlero* maxime suaserim. Nec contemnendus est *Schnobelius* velut *Treutleri* epitomator.

§. 81. *Collectionem Controversiarum brevem excipit diffusa & plena; eaque iterum tum qualis facta est, tum qualis fieri debet. Qualis facta sit, nimis manifestum est: huc enim pertinent grandes libri Decisionum ex variis dicasteriis, rotis, parliamentis, v. g. Rotae Romanae, Genuensis, Senatus Pedemontani, Tholosani, Sandae Frisicae, Guil. Grotii Belgicae, Molinaei*
Con.

Consuetudines Parisienses, Royz Decisiones Lithuanicae, *Fabri* Sabaudicae, *Gailii*, *Mynfingeri*, *Gylmanni* Camerales, *Schepliz* Consuetudines Marchicae, Decisiones Facultatis Juridicae Lipsiensis in *Sigism. Finckelthufii* Observationibus; & Scabinatus Lipsiensis in magni *Carpzovii* Variis: Jenensium Responsa collegit *Richterus*. Huc aliarum facultatum Academicarum consilia, tubingensium, ingolsta-
diensium, marpugensium, altorophinorum, & consilia privatorum: *Pauli a Castro*, *M. Ant. Nattae*, *Coleri*, *Klockii*, *Vvesembecii* junioris, *Mundii*: & quis omnes fando comprehendat? Sed verum est iudicium *Hug. Grotii* praef. lib. de Jur. Bell. ac Pac., auctores Consiliorum magis ad gratiam consulentium, quam acqui-
bonique naturam responsa sua accomodasse. Praetereo jam multos alios per omne jus diffusos, ut opera *Prosperi Farinacii*, *Menochii* Arbitrarias Judicum Quaestiones & variorum; communes opiniones, ut *Villalobii*, *Vivii*, eorumque, ex quibus suum jus controversum contraxit *Nic. Vigelius*, unus omnium maxime adhibendus: nec spernendus *Petr. Greg. Tholosanus* in Syntagm. Jur. Univ.

§. 82. In his auctoribus laudabile est, quod novos emergentes casus perpetuae memoriae consignant, orbemque juridicum continua auctione locupletant; quod non faciunt auctores exercitationum & commentariorum, semper vetera ruminantes: quapropter & practico, atque in re-
rum

rum usu versanti, hi parcius legendi, illi diligentissime pervolutandi sunt. Sed desidero ratione materiae, quod immiscent etiam casus pervulgatos, atque aliis dudum decisos, item casus per se manifestos, & ex generalium, quae certi juris sunt, subsumptione mera determinabiles. Deceret potius ad alios auctores tantum supplementa addi, ne inutilibus repetitionibus orbis oneretur, aut, si quid ab iis dissentias, vel novam aliquam rationem, objectionemque habeas id quoque admoneri; non omnia denuo exscribi sumptusque typographis & lectoribus sine necessitate constari. Ratione formae, ordinem illis optarem, qui vel nullus esse solet, vel non naturalis: nec nimis fuse una quaestio tractanda est, ut faciunt auctores Consiliorum, qui ut tanto grandiore & pretiosiore, si Diis placet, laborem suum reddant, in omnibus propositionibus obiter occurrentibus tamdiu distinentur, quam in quaestione principali: unde fit, ut in vulgatissimis certissimisque axiomatibus, textibus, & auctoritate Doctorum stipandis desudent; propositionem vero principalem, & maxime controversam saepe sine ulla probatione relinquant, aut jejunis frigidisque tantum ratiunculis topicis, non accuratis demonstrationibus muniant. Quod jam olim admonere *Corn. Summenhart* in lib. *Contract. & Thomingius* facultatis juridicae Lipsiensis, quondam decanus ordinarius, in sua oratione de Studio Juris. Utinam imitarentur illos, quos toties citant & crepant, Juris-

jurisconsultos veteres, qui paucissimis saepe lineis magnam argumentorum vim presterunt. Ego non dubito, responso aliquo Ulpiani vel Scaevolae vix paginam occupante, nostros illos bonos decisionarios supra 10. plagulas impleturos. Ab hoc tamen vulgi grege se junxit se *Anton. Faber* in Codice Sabaudico, egregieque nostris hominibus praeluxit facem, quomodo solide simul breviterque disputari possit. Laudabilis quoque & ad veterum Jurisconsultorum dicendi rationem mos est, quo facultates scabinatusque Saxonici, Lipsiae in primis, in suis consiliis germanicis (vocant *informar urtheil*) rationes utrimque summa brevitate & nervositate ventilant.

§. 83. Huc pertinent & tractatus variorum de variis materiis, iisque vel juris, v. g. de Fideicommissis *M. Ant. Peregrinus*, de Mutuo *Salmasius*, de Pignoribus *Negusantius*, de Pactis *Alexander ab Exea*, de Matrimonio *Th. Sanchez*; vel de terminis facti, sed ad jus applicatis, ut de Surdis, Mutis *Michalorius*, de feminis *Carpovius*, de Molendinis *Hering* &c. Interdum non certum aliquem titulum, sed aliquid a variis materiis tam juris quam facti abstractis tractant, uti *Corsetus* de Geminatione, *Joh. Bapt. Costa* de Retrotractione; ut innumeras id genus disputationes taceam, quales collectae sunt in tomos Disputationum Basileensium. Tractatus veteres omnes fere collecti sunt in Tractatum Tractatum, vastum opus aliquoties editum. Ad-

ditus

ditus est plenus admodum & diligens index; totum unus volumen absolvens: sed desidero nimias repetitiones, dum non nucleus auctorum insertus est, sed integri, quum tamen saepissime inclusi sint plures auctores de eadem materia, quorum unus pleraque cum altero eadem habet. Recordor me in Tractatu Tractatum aliquando legisse duos de Ludis tractatus, unum *Paridis de Putco*, alterius nomen non succurrit: horum unus alterum ad verbum exscripserat. Ita fit, ut in certis materiis nimis dives sit opus, in aliis vero pauperrimum. Quare imposuit *Drexelio*, qui ei persuasit, ut ipse narrat in *Aurifodina*, hoc opus in jure, aliorum librorum omnium instar esse. Operae pretium esset, si reformarentur hi Tractatus Tractatum, omitterentur aliena, contraherentur varii auctores de iisdem materiis in unum & adderetur nucleus ex plurimis tractatibus de variis materiis interim hoc in primis saeculo editis. Id olim potuisset facile fieri eadem opera, qua index cum summariis contextus est: nunc quoque index ad eam rem multum adjumenti praestare potest. Sunt speciales Tractatus Tractatum, v. g. Tractatus de Pactis uno volumine editi sunt, item de Testamentis &c. Tractatui Tractatum Juridicorum apud theologos quodammodo respondent praeter alios celebres *Biblia Critica Anglicana*, in quibus variorum selecti tractatus theologici ad loca Scripturae sunt collecti. Est & aliud opus juridicum Tractatui Tractatum non ab simile, quod vocatur *Repetentes*. Angli,

ut audio, moliuntur in Philosophia curiosa simile aliquid, quod inscribent Bibliothecam Philosophicam; in quam variorum scripta philosophica, physica, mechanica, mathematica, curiosa, selectis contemplationibus & experimentis plena compingent. Sed ut ad tractatus juridicos redeam, confectis illis *pandectis juris*, de quibus mox, poterimus tractatibus facile carere; praesertim quum in iis saepissime vix dimidia pars ad ipsam materiam pertineat. Legat mihi aliquis ex gr. *Th. Sagittarii* de Comitibus Palatini tractatum mirabor, si decimam partem de proposita materia agere dicet.

§. 84. Diximus de *collectione controversiarum diffusa*, qualis facta est; dicamus, qualis fieri debeat: ubi iterum videamus tum de praeparatoriis, nempe *repertoriis*; tum de syntagma-
te ipso; quod dicemus *pandectas juris*. *Repertoria* ab aliis varia confecta sunt: quid nobis videatur, subiiciamus. Aliorum conatus quod attinet, exstat *Brederodii Repertorium Juris Civilis*, tamquam Index legum Justinianearum, quem utilissimum sane ad usum quotidianum miror non recudi. Ex doctorum placitis collectum est *Repertorium Bertachini*, & *Conclusiones Cardinalis Tuschi*. Huc pertinent lexi-
ca, ut *Speidelii Thesaurus*, *Reigeri Loci Communes*, *Brunori a Sole* cum additionibus *Jac. Schultes*. Huc pertinet *Bibliotheca Juris extruenda* magis de novo, quam ab ullo pro dignitate fundata: nam quod olim *Nevisanus*, &
Freg-

Freymonius tentarunt, exiguum admodum & mancum est. *Bolduani* & *Draudii* Bibliothecae Juridicae (illius separata, hujus in Bibliothecam Classicam inserta) sunt ex catalogis librorum confectae, ubi multi recensentur libri, neque editi, neque umquam edendi, ova nunquam posita, *ungelegre eger* ut ille dicebat. Deinde, quum libros ipsi non adspicerent, tantum titulos in catalogis, effectum est, ut saepe, quid in libro tractaretur, non assequerentur; sunt enim tituli librorum haud raro nimis magnifici multumque a materia abludentes. Erant praeterea uterque Jurisprudentiae impetiti; unde etsi liber revera exstaret, & titulus libro corresponderet, ignorabant tamen, sub quem titulum in sua Bibliotheca referrent: unde tutissime se facturos crediderunt, si referrent sub titulum ab auctore praescriptum; sed revera ineptissime egerunt, quia tituli auctorum libris praefixi, ut plurimum sunt Oratorii magis & pomposi, quam technici & accurati. Optandum igitur esset, ut Bibliotheca *Draudii* Classica non continuaretur solum (pervenit enim ad annum 1625.), sed & reformaretur. Continuationem ejus molitus est *Meisnerus*, Torgaviae rector, sed reformationem addidisse non puto; mortuus, opus interruptum reliquit. Bibliothecam Practicam promissit *Jac. Gotthofredus* in sui Manualis partem practicam adhuc edendam inserturus, sed nihil aliud, quam promissit. Miror vero, nullum Jurisconsultorum praestitisse, quod in scripto.

ptoribus medicis *Job. Antonides* Van der Linden, & in Bibliotheca Theologica *Gisb. Voerius*. Promisit tale aliquid *Paul. Bussius* in praefatione Commentarii sui ad Pandectas, sed nec ille fidem suam liberavit. Interea aliquid huc faciunt Vitae Jurisconsultorum Germanorum *Melch. Adami*. Et haec de bibliothecis juris, quibus affines sunt *sedes materiaram*: solebant enim Jurisconsulti sequioris aevi ad certas leges materiam aliquam plene & solemni apparatu tractare; indicem igitur talium habere, operae praetium est, ut quaerendi labor absit. Talis index, sed nimis brevis, insertus est Institutionibus *Julii Crispini*, plenior ordine alphabetico in cl. *VVoldenbergii* Manipulis. Deceret similem indicem apud philosophos condi, ut haec obiter dicam, ut constet, ad quae loca *Aristotelis*, *Magistri*, & *Thomae*, quae quaestiones a commentatoribus ex professo tractentur. Respondent proportionem Loca Classica Theologorum. Haec possent in allegando singulari aliquo caractere, vel nota ad differentiam, tam apud theologos quam Jurisconsultos, designari.

§. 85. De repertoriis vidimus aliorum conatus; dicamus, quid nobis videatur de locis communibus juris instituendis: de quorum videamus causa efficiente, modo causandi, materia, forma, fine seu usu vel effecta. Differunt alioqui de locis communibus praeclarae *Bartholomeaus Kerkermannus*, sed maxime in ordine ad politicam

Causa

Causa efficiens esse debet societas aliqua ex multis correspondentibus conflata; neque enim unius hominis opus est. Quemadmodum igitur, in Italia conspirant Academiae, seu Collegia eruditorum, de quibus vide *Sachsum* in praefatione *Ampelographiae*, & *Besoldum* in *diff. de Universitatibus, Corporibus, Academiis*; in Gallia celebre est Collegium illud nobile aliquantisper silens, nunc redivivum, *de l'esprit*; in Anglia Collegium Londinense Medicorum, & nobilis illa Societas Britanica, cui primarii, quique totius Regni eruditissimi viri interfunt, ex qua nuperrime prodiit *R. Hooke* *micrographia*, seu de rebus non nudo, sed armato per microscopium visu spectabilibus; in Germania collegium medicorum naturae curiosorum, nomine *curioso* illi gallico, cujus meditationes in germanicum nuper verbae, consonans. Ita decebat & Jurisconsultos per Germaniam, praesertim qui in Academiis otio fruuntur, ad rem tam praeclaram, qualis est index juris universalis, seu *loci communes juris*, conspirare; neque enim facile creditu est, quantum conjunctae vires possint. Hinc Catholicis praeclara edendi, magna commoditas est in libro enim, qui unius hominis nomine prodit, saepe laborant tota monasteria. Ita *Dav. Doringius* Bibliothecam Juris Universalem laudabili magis voluntate, quam facto molitus, variorum manibus usus est sed ultra litteram *A* non pervenit in suo alphabeto.

§. 86. *Modus causandi* in eo consistit, quæ ratione labor inter eos distribuendus sit. Quidam statuere materias alias adsignandas, unum debere omnia colligere, quæ ad tutelam & curam alium, quæ ad hereditates ab intestato, alium, quæ ad substitutiones pertinent &c. nam ita & olim moris fuisse in Italia, ut quidam doctor in certa aliqua materia excelleret, in aliis esset plane infans: quemadmodum de quodam narrant, qui omnes pernoverit substitutionum difficultates, in ceteris hæserit. Et deceret hodie quoque, ut in Academiis professores non ratione librorum juris, sed ratione materiarum distribuerentur: alius haberet materiam successionum; alius juris inter vivos, alius criminalia, feudalialia, ecclesiastica quasi semipublica, alius processum, alius denique institutiones, seu synopsis omnium. Ego quod ad rationem distribuendi professiones, non reprehendo, nam & Medici sic distribuere; sed in locis communibus colligendis obstare judico, quod ita singulis collectoribus pervolutandi sunt omnes libri. Decet igitur potius, non materias, sed libros in eos distribui, hac ratione, ut aliis adsignentur auctores veteres Bartolus, Jason, Alexander, aliis recentiores, aliis Theorici, aliis Practici, aliis Germani, aliis Itali, aliis consilia, aliis dicasteriorum decisiones, aliis tractatus, aliis commentarii. Adde, quæ fuisse *Janus Cæcilius Frey* in *Via ad Scientias & Artes*.


§. 87. *Materia seu objectum sunt auctores, & quae ex iis excerpuntur. Auctores adhibeantur ante omnia ii, qui alios solent citare, & allegationibus paginas complere: ex iis allegationes transcribantur, vel saltem ad eos fiat remissio: denique fiat gradus ad eos, qui libros miscellaneos scribunt, v.g. Observationes Cuiacii, Salmasii ad Jus Romanum & Atticum, Hottomanni Quaest. Illustr., Emendationes Anton. Augustini &c.; quod enim in his boni reconditum est, non facile apud eos quaeritur. Deinde promoveatur pes ad scriptores tractatistas, & ex iis adnotetur sub titulum quidem materiae, de qua agunt, nihil aliud, quam nomen auctoris, qui de hac materia scripserit; de cetero nihil excerpatur ad illam materiam pertinens, sed ea potius, quae aliena interferuntur. Similiter ex commentatoribus nihil aliud excerpatur, quam sicubi aliquid ad textum adnotant, quod ad eum non pertinet; de cetero adnotetur ad leges numeratas (de quibus sup. §. 62.), quis de eo textu in specie scripserit: nam si ad totum librum scripserit, ad totius quoque libri frontispicium hoc adnotetur.*

§. 88. *Forma excerpendi est, ut perlegatur primum auctoris index, vel summaria; qui si diligens est, excerpatur ipse, & perlegi liber cursorie tantum deinde potest: adnotentur auctoris non libri, & capita (hoc enim nimium), sed paginae, dummodo praenotes, qua editione sit usus; & potest deinde, & alius facile obiter*
sup -

supputare in sua editione: in titulis autem maxima diligentia est adhibenda, ut accurate assignentur; sed bene fieri poterit ex Elementis, ubi in partitionibus termini juris enarrantur: addatur *Bern. Lavinheta*, Monachus Ordinis Minorum, in Com. ad Artem Magnam Lullii, ubi terminos juridicos non inepte recenset. Ut tamen titulos assignari denuo necesse non sit, commodissimum est, dictionarium charta pura distingui, & cuilibet voci in latere adnotanda adscribi: porro quoties auctor de materia tota agit, adnotetur locus ad vocem simpliciter, v. g. de Dominio; sin de certo aliquo subtitulo, ad illum adnotetur, v. g. de Modis Acquirendi Dominii, seu Causis; vel denique de certa in aliquo subtitulo quaestione, v. g. *sine donatio modus acquirendi dominii*, & quum formantur tales quaestiones, ut plurimum duobus locis fieri debet adnotatio; v. g. ista proxima adnotari debet ad dominii causam, & ad donationis effectum, ideo ex uno loco ad alium fiat remissio, ne idem bis adnotari debeat: quaestioni addatur signum A. vel N. vel D. ut sciamus, num auctor affirmet, neget, an dubitet; item signum unde sciamus, tractetneulse, accurate &c. quod & admonet *Drenelius* in *Aurifodina*.

§. 89. *Ufus finis, & effectus* locorum communium hic esto. Ubi quilibet pensum absolverit, fiat deinde collectio in unum; sed ita ut iam fiant toto libri, quot personae in considerandas ipsis *pandectis* adhibebuntur, & quae distributio

I 2



nes: quum enim pandectarum confectio fieri debeat secundum materiarum distributionem, sic v. g. uni assignata materia institutionum, alii legatorum, alii codicillorum; ita in unum librum conscribantur collectanea de legatis, in alium de codicillis &c., & cuilibet suum detur, ut, evolutis auctoribus, ex iis nucleum conficiat in pandectas referendum.

§. 90. Syntagma ipsum juris universi, seu *pandectae* fiant, ut dixi, ex locis communibus, eodem ordine, quo *elementa institutiones, breviarium*. Ponantur propositiones, quantum fieri potest, universales, & controversiae, casusque tantum ii, qui sunt dubii: addantur rationes demonstrativae ex Elementis, &, sicubi difficilis objectio est, illa solvatur, leves omittantur. Si casus in legibus decisis est, non allegetur alius auctor, nisi ille rationem aliquam egregiam decisionis afferat, aut objecta diluat. De cetero in qualibet quaestione, vel casu adnotetur unus tantum auctor, qui primus eum attulit, ac determinavit; addantur illi tantum, qui novas quasdam rationes de suo attulerunt, aut solverunt, & allegata quidem addantur margini. Nec erit incommodum, si in uno libro *elementa, breviarium, pandectae* imprimantur, sed diversis typis. Talem *pandectarum* librum certus sum, supra duo volumina in folio non impleturum; quia in nulla disciplina, & facultate plus librorum, minus rerum est, quam in Jurisprudentia, & cumulantur repetitiones in infinitum. Perfectis jam
pan-

pandectis fastigium impositum erit Jurisprudentialiae; jamque; filere cogentur loquacissimi illi exscriptores, & confarcinatores tractatistae, quia index horum *pandectarum* instar omnium tractatuum erit. Si tantum audebunt aliquid in jure scribere, qui novum aliquem dubium casum observaverunt: nam theoria ad *Jurisprudentiam exegeticam*, & *historicam* pertinentia proprie ad jus non spectant, ideo nec *pandectis* inferenda. Quicumque autem aliquid in jure, confectis *pandectis* scribet, non repetet, quae in *pandectis* continentur, sed supplementa tantum, novasque observationes emittet. Haec, quae de conficiendis *locis communibus*, & *pandectis* diximus, ridebunt illi, qui ignorant, quid diligentia & ordo possint: ego vero certus sum, triginta homines opus hoc quantumcumque est, triennio absolvere posse. Sed, quod recte in alio argumento suavit *Janus Caecilius Frey*, incipiatur ab auctoribus vetustissimis ordine temporum, ut haberi semper ac consecrari memoriae primus inventor possit. Nisi vero quamprimum suscipitur negotium, vereor, ne succrescente quotidie nova segete, ita oneretur denique suffoceturque inutili librorum mole Jurisprudentialia, ut facilior nunc labor omnem tandem humanam diligentiam vincat.

§.91. Delineavimus ideam *Jurisprudentialiae perfectae*, absolvimusque, quod difficillimum erat magnitudinem rei vel votis adsequi; sequitur ut *viam grassandi ad ejus adyta* designemus. Illic di-

mus, quae doctori; hic, quae discipulo necessaria sint, dicemus. Illic explicata sunt, quae ad perfectissimum Jurisconsultum in dicasterio aliquo operae pretium facturum requiruntur; hic enarrabimus, quae ad ponendum tyrocinium, & prima boni advocati rudimenta pertinent. Quemadmodum & in Parte Generali didactica primo in idea de ipsis subjectis, causis, objectis seu speciebus habitus usque ad §. 41., in reliquis quatuor paragraphis tanto brevius de ipsa discendi ratione usque ad finem sumus meditati; ita hoc loco imperfectius, methodum nempe discendi docendique, prout cujusque intentio est, vel ad summa contendendi, vel in secundis tertiisque consistendi, restat sub finem explicemus. Toties autem aliquis sibi praeceptor esse potest, quoties non admonebimus praeeptore indigere; adhibito tamen manu ductore & illa jucundius faciliusque discet. Ceterum tria erunt *curricula* hujus viae, unum *elementare*, alterum *exegeticum*, tertium *polemicum*,

§. 92. Notandum hic, quum certum tempus assignabimus, 1) non exacte, sed circiter definiri: 2) hoc esse pro mediocribus ingeniis; neque enim tardos subsistere, nempe celeres praevenire veto: 3) non debere aliquem esse assiduum & accubuum; satis erit & plus satis, si quotidie horae juri impendantur ad summum sex, cujus duae horae cum praeeptore, si quis est, duae ruminationi, reliquae duae lectioni volitanti, maxime historicae, impendantur. Le-

ctio

Bio autem *historica*, de qua in posterum non amplius dicemus, instituatur hoc modo: Historia universalis studiose cognoscenda est, deinde historia nostrorum temporum; & haec tempore *curriculi elementaris*; in primis historia religionis (§. 35. 41.) & dogmatum (§. 37), Imperii, status rerum publicarum per orbem hoc tempore (§. 40.): quando vero gradus fiet ad compendium librorum authenticorum, seu tempore *curriculi exegetici*, legatur diligentius Historia Romana (§. 31. 32. 33. 34.): denique quum ad breviarium controversiarum, seu *curriculum polemicum* perventum erit; legatur historia juris interna, seu leges variarum Rerumpublicarum (§. 29.), historia ecclesiastica regiminis (§. 38.), historia rerum germanicarum, & mediæ ævi (§. 39.): ita singula singulis accurate correspondebunt.

§. 93. Nunc age ad ipsa *curricula* studii juris progrediamur. *Curriculum elementare* continet *historiam juris rudem, terminos usitatos, & præcepta elementaria*. Diximusque supra (§. 69.) optandum, ut pueri, qui Jurisprudentiae destinantur, prima latinitatis rudimenta discant ex libris juridicis, v. g. institutionibus Justinianeis tit. de Origine Juris, Verborum Significatione, & Regulis Juris; sed quum hoc vulgo non fiat, de ordinariis saltem dicamus: diximus enim Parte Generali (§. 42.), ab anno 12. usque ad 18. primario exercendos in ea professione, ad quam destinantur. Ut autem reliqua studia ibi

enumerata ne amittantur, studio juris, ut (§. 93.) dixi, non dabantur horae quotidie plures quam quatuor: unde non omnia haec tria curricula elementaris membra conjungenda, sed ita separanda sunt, ut *historia juris rudis* ante omnia cognoscatur ab Urbe Roma condita ad nostra tempora usque deducta, exemplo tituli de Origine Juris. Poterit haec in tres plagulas contrahi, & ita accurate pernosci duabus septimanis. Interea in defectum alterius legatur *Jac. Gotbofredi & Guil Forsteri* Historia; sed deest illis historia juris recentis: sic cognoscat nomina, tempora, auctores, & differentias librorum authenticorum. *Libros autem Authenticos* voco, ut semel in universum moneam, non tantum leges veteres, sed & recentes, ut Recessus Imperii, Corpus Saxonicum, & cujusque Reipublicae statuta vel reformationes.

§. 94. *Historiam* sequuntur *termini usitatiores*; & incredibile est, quantum in qualibet disciplina valeat terminorum cognitio, quos Mathematici non immerito praemittunt. Hi quomodo dispositi esse debeant per partitiones, diximus (§. 7. & 22.): in defectum vero libelli sic ut optamus confecti, adhibeatur Compendium Jurisprudentiae *Vultei* in Belgio forma 12. editum; sed desunt hic quoque termini Juris Germanici medii & recentioris. Hic praeceptore opus est, qui ad meliorem definitionis intellectionem casum aliquem, eumque maxime notabilem, ridiculumve, ex historiis veris data

occa.

occasione confingat: v. g. ad exemplum testamenti inter liberos, introducat Regem Philippum inter filium Demetrium & Persea controversias testamento componentem; & similiter de ceteris; nam notae, quo sensibiliores sunt & notabiliores, hoc plus valent ad memoriam (per §. 14. & 23. Part. General.). Nec incommode termini inter discentes a Praeceptore sic distribuentur, ut unus hujus, alius alterius termini historias memoriter recitare possit (§. 13. Part. General.): & quia interrogando excitatur judicium (v. Praefat., ubi de exemplo Socratis, unde *Jonsionius* in *Idea Hygieines* collegia interrogatoria commendat), jubeantur ipsi casus applicare ad terminos, & contra: detur & opera, ut pro pluribus terminis fiat unus casus, ut tanto plus connexio memoriam juvet. His poterunt impendi menses duo cum dimidio.

§. 95. Post terminos sequantur *praecepta elementaria*. Ea quum omittenda sint, quae ex terminis ipsis manifesta sunt, & cuilibet rustico patent si terminos intelligeret, remanebunt pauca fere in solemnitatibus tantum consistentia. Omittendum praeterea est jus vetus, & abrogatum, ut diximus supra (§. 23.); cujus rei ratio reddenda est hoc loco: erunt enim forsasse nonnulli, qui vulgari modo a Justinianeis Institutionibus incipiendum, deinde ad Digesta Codicemque progrediendum putabunt; quorum mihi numquam placuit ratio. Sic enim 1) orien-

tur inutiles repetitiones: 2.) singuli hi libri juris veteris proprium ordinem habent, hinc confusio discientium: 3.) saepe ille ordo est ineptissimus: 4.) illi libri continent multa ab usu remota; nemo autem alicui latinam linguam traditurus, incipit a fragmentis obsoletis *Ennii* & *Pacuvii*, tametsi tempore priora Cicerone fuerint, & eorum, qui cum judicio usum a non usu separare possint, stylum juvent. Immo; volunt praeclari quidam docendi mastri, in latinitate instillanda a recentioribus incipiendum, quorum & phrasae & res nostro aevo commodiores. Frustra respondent, leges veteres originem hodiernarum esse, quae ex illis fluxerint: nam & obsoleta latinitas Ciceronianae origo est; in discendo autem non semper natura rerum, sed commoditas spectanda est: originem judicio confirmato deinde facile discent. 5.) Illi libri ob multa vetustatis vestigia statumque Reipublicae a nostro abhorrentem sunt difficiliore; hinc 6.) confusio fit Jurisprudentiae exegeticae & didacticae, & 7.) tyro praeter rerum difficultatem etiam verborum obscuritate oneratur: 8.) immo inferuntur juventuti falsae opiniones de Republica hodierna & regimine Romani Imperii, ut eundem cum veteri esse arbitrentur statum, nempe monarchicum: in quem errorem lectio juris veteris, & hodierni ignoratio plurimos Jurisconsultos duxit, quod non male conqueritur pessimus alioquin auctor *Hippolitus a Lapide*. Quem vero librum potissimum commendem
inte.

interim, qui in defectu conficiendorum Elementorum, Juris legatur, quique jus hodiernum methodice breviterque tractaverit, non invenio; magno, nescio, an pudore meo, an Jurisprudentiae dedecore. Porro, ut *praecepta elementataria* hodierna tanto melius retineantur, detur opera praeceptorum inter explicandum, ut cuilibet placito juris, etiam arbitrario, rationem assignet, aut congruentiam quamdam interdum ridiculam excogitet; v. g. testes in testamento requiri septem, quia septem sint syllabae horum verborum *testes in testamento*. Talibus utuntur Judaei in docenda lingua Hebraica. Porro tam in definitionibus, quam praeceptis allegentur ad marginem loca legum classica; eaque inter docendum evolvantur, ut paulatim assuescant stylo legum, & adquirant memoriam in illis localem, promptitudinem evolvendi, & confusam cognitionem. Cognitis igitur *terminis*, impendentur *praeceptis elementaribus* 3. menses; & ita *curriculum elementare* anno dimidio absolvetur.

§. 96. *Curriculum exegeticum* sequitur. Sed ne nunc quidem ad ipsorum juris librorum ordinatam totalemque perfectionem tyro ducendus est, antequam combiberit *breviarium controversiarum*, seu *curriculum polemicum* absolverit; quia alioqui nullo usu leget, non intelligens, quo quid collimet. Sed si controversias pernoverit, non solum scopum videbit, sed & inter legendum, proprio Marte nova ab aliis non depre-

prehensa ipse, ad hujus, vel illius controversiae decisionem spectantia, observabit. Ut tamen quoad summa rerum capita perinde sit, ac si libros legum authenticos legisset, proponantur 1) series titulorum, 2) Institutiones Juris Universi, seu compendium librorum authenticorum, 3) antinomia. Series titulorum per tabulas optime discetur imaginando sibi fortiter methodum Triboniani; & quantum fieri potest, titulos unius libri sub unum genus commune redigendo (adde supra §. 52.). Nos certe libros Codicis duodecim versibus sic complexi sumus, unoque sic cujuslibet titulos comprehendimus, ut qui hos teneat, facile e vestigio judicare possit, ad quem librum pertineat quilibet titulus, quum tamen in Codice tam multi sint unius libri tituli. Series titulorum *Jac. Gothofredi* maxime placet; & poterit mense absolvi, dum accedat postea evolvendi exercitatio.

§. 97. Institutiones Juris Universi, seu compendium librorum authenticorum, quomodo conficiendum sit, diximus (§. 54.). Hoc jam juris cultori pervolvendum est, ut non solum, quid juris sit, sed & quid juris fuerit, discat; quorum illud ex Elementis, hoc ex Institutionibus hauriet: Institutionibus enim his, seu compendio inferenda erunt & abrogata, quemadmodum in suis Institutionibus *Justinianus* ipse eorum non obliviscitur. Allegenda sunt ad marginem & evolvenda loca legum, non solum classica, ut in Elementis (§. 96. fin.), sed omnino ad omnia rem

rem pertinentia, ita tamen, ut classica singulari signo vel caractere dignosci ceteris possint. Pro Institutionibus Juris Interni in defectum adhiberi poterit Jurisprudentia Romana *Vultei*, non brevis illa in Belgio forma duodecima edita (de qua §. 95.), sed grandior in forma octava edita Marpurgi, quae munus hoc non incommode implet: quia vero plurima Elementis praeoccupata sunt, poterunt tribus mensibus absolvi Institutiones; evolutio enim non in collegio fiet, sed domi. Praeceptor aliqua tantum loca extra ordinem huic vel illi evolvenda proponat in ipso collegio, diligentiae excitandae causa. Antinomiae quomodo in brevem libellum colligendae, quem diximus Antinomieum Minorem explicatum (§. 53.), sed sic tractandus: Primo evolvantur juris loca, & tentet juris studiosus, an possit proprio Marte penetrare, tum in quo leges obstant, tum quomodo conciliandae: deinde consulat alios, qui antinomiam solverunt; non quod eorum solutionem memoriae mandare necesse sit, sed ut artem solvendi ipsis exemplis discat, assuescatque leges etiam ab aliis non conciliatas ad harmoniam redigere; sed eas, quas magni viri insolubiles judicant, diligenter memoriae mandet. Igitur poterit antinomicus mense uno non difficulter absolvi. Sed talis, qualem requiro, scriptus non est, poteritque quatuor plagulis comprehendi. Quare totum exegeticum curriculum itidem semestri finiatur. Interim, durante curriculo exegetico, poterit juris

cul.

cultor collegiis disputatoriis paulatim assuescere, curias etiam & judicia frequentare, & acta publica evolvere, quae res incredibiliter ad praxin & realia praeparat.

§. 98. Curriculum polemicum sequitur, quod alterum studii juridici annum sibi deponit. Nunc igitur ad *breviarium controversiarum* accedat studiosus juris, non quasi jam Iudex, sed haecenus ut cognitor tantum. *Breviarium* quomodo conficiendum, & ab alienis segregandum sit, diximus (§. 78.); sed quum tale nondum confectum sit, cogemur interim in gratiis nostris *Treutlero* uti. Quomodo autem adhibendum sit, nunc dicemus, remque plane singularem in publicum proferemus, mixturam nempe collegii disputatorii, & practici in isto super *breviarium* collegio experiendam. Scilicet sint discipuli ad minimum duodecim: horae diei impendendae duae: quaestiones quolibet bihorio tractentur 12.: 6. discipuli sint respondentes, 6. opposcentes, seu 6. actores, & 6. rei: quilibet 2. quaestiones minimum defendat, vel oppugnet: modus tractandi non sit diffusus, syllogisticus, sed Germanicus, practicus, ut in iudicio; inde discent *vom mund aus in die feder versahren*, seu oretenus proponere, & ex tempore respondere, & replicare, actor formet casum *in seinem satz*, in sua propositione, & adferat argumenta pro; reus respondeat & adferat argumenta contra brevissime, sine inutilium verborum coarcevatione: haec reciprocatio bis fiat; Praeses vero, tam-

tamquam Judex, concipiat sententiam, eique rationes decidendi inferat. Ita aderit hoc compendium, quod multa argumenta simul congerentur in unum, non proponuntur syllogistice, nec invitationibus tempus teretur, aut adsumptionibus, aut gratiarum actionibus. Et quia in foro, aut deliberationibus, orationibusque publicis argumenta non proponuntur syllogistice; discet ita juris cultor vim argumenti percipere, & latentem errorem detegere, etsi non sit syllogisticum: neque enim Logicae, neque Latinae linguae discendae causa tale collegium disputatorio-practicum habetur. Erit & haec utilitas, quod in responsionibus, & replicationibus extemporaneis, quolibet suum sermonem sine alterius interpellatione, ut in publicis magnorum virorum Orationibus moris est, deducere, meminisse necesse est multorum alterius argumentorum, vel responsionum, quod, nisi assuetus, non potest; assuescet autem optime Juvenis tali collegio disputatorio practico: vulgaris enim in Academicis disputandi mos in communi vita non est usitatus, tum quia latinus, tum quia interruptionibus creber; sed in publicis consensibus, deliberationibus, concertationibus Senatorum, Legatorum, & Advocatorum non licet alterius sermonem interrumpere: quare & Juvenes in Academicis paulatim ad usum communis vitae sunt praeparandi. Porro actor casum formatum reo ac Judici communicet die proximo antecedente. Brevitate autem summa opus est, ut quolibet



libet hora possint absolvi 6. quaestiones. Sed hic adhiberi potest egregium artificium; nempe plures quaestiones cognatae ejusdem materiae possunt commodè in unum casum compingi, quemadmodum & in judiciis multae controversiae simul concurrunt: ita res facillime exitum sortietur, poteritque anno absolvi *breviarium*, etsi 3600. quaestiones contineat. Ad Argumentum autem pro & contra habenda, disputantes loca legum & Doctorum in *brevario* citata evolvant; ita poterit unus alterius rationes praevidere.

§. 99. Atque ita totum studium juridicum biennii spatio finietur, & plus fortasse efficietur, quam quinquennio illo vulgari, quod auctor Menippi anonymus, sed, ut conicio, *Job. Valentinus Andreas* in *Magia Christiana*, ad tam exiguum temporis spatium, si inutiles occupationes subtrahantur, reduxit, ut me lustri hujus pudeat, misereaturque. Decurso hoc biennio, desinet studiosus juris discipulus esse, jamque ipse sibi controversiarum judicium adrogabit, &c.

*tandem custode remoto,
in aprici gramine campi*

per Jurisprudentiae vasta spatia volitabit; leget libros legum authenticos pedetentim, titulos, legesque maxime necessarias prima vice, ceteras pro gradibus in libro illo supra (§. 48.) laudato assignatis; subinde addet, eliciet inde, quae

quæ ad variarum controversiarum decisionem faciunt, & novas regulas, nova universalia, ab aliis neglecta fabricabit; adhibebit commentarios, penetrabit in rationes legum, & sibi paulatim ipse legislatoris prudentiam saltem, nisi & personam sumet; deinde in vastum controversiarum pelagus progressus, observabit dicasteriorum consuetudines, traditasque eis a majoribus sententias, pugnas dissensusque invicem, & pro ratione populorum, pro Rerumpublicarum diversitate variantia jura notabit; discetque ex immotis juris naturæ principiis, & utilitate publica continuo nexu firmas demonstrationes deducere, & inanes pragmaticorum argutias & allegatiunculas, & contortos ex doctorum auctoritate impertinentes, & applicatione brocardicorum inepta nodos, scientiæ invictæ gladio secare. Hunc ego verum juris philosophum, hunc justitiæ sacerdotem, hunc juris gentium, & quod ex eo pendet, publici atque divini consultum dixerò; cui possit committi Respublica, quem neque ineptæ status ratiunculæ ad novandum impellant, neque a promovenda publica salute inanis juridicarum quarundam spinarum metus deterreat: concident sponte sua machiavellistarum convicia (ipsi se politicos, & si Diis placet, etiam statistas vocant), qui Jurisconsultos rerum imperitos, cautelarum scientes ineptos, Leguleios vocant; desinentque Principes Gulonum quorundam aulicorum consilia, aut verius jugum pati, quando egregius

vir

vir auctoritate, & eloquentia munitus, consiliis suis non aequitatem magis quam utilitatem (inseparabilis recte aestimanti socias) circumponet.

§. 100. Hoc omine finiremus, nisi praestaret dispersa quaedam in superioribus in unum contrahi; primum *computationem temporis*, deinde *catalogum desideratorum* ad imitationem *Fr. Baconis* in *Augmentis Scientiarum*.

Computatio temporis haec est:

Anni, Menfes, Septimanae	A.	M.	S.
Pro Historia Juris Rudi,	-	.	2
Terminis Juris,	-	2	2
Praeceptis Elementaribus.	-	3	.
<hr/>			
Summa Curriculi Element.	-	6	-
Pro serie titulorum,	-	1	-
Institutionibus Univers.,	-	4	.
Antinomico minore.	-	1	-
<hr/>			
Summa Curriculi Elementaris & Exegetici simul.	1	-	-
Pro Curriculo Polemico seu Bre- viario controversiarum.	1	-	.
<hr/>			
Summa Studia Juris.	2	-	-
Reliquum tempus lectioni liberae peregrinatio- nibus, praxi, & negotiis vitae tribuendum.	-	-	-

Ca-

Catalogus desideratorum hic esto:

Ad perficiendam Jurisprudentiam fiant

1) Partitiones juris	5.	2
2) Sciagraphia juris in artem redigendi	21.	
3) Novum juris corpus	22.	
4) Elementa juris	24.	
5) Reformatio brocardicorum	25.	
6) Compendium Menochii & Mascardi de probationibus & praesumptionibus	26	
7) Theatrum legale	29.	
8) Historia mutationum juris	29	
6) Historia irenica	41.	
10) Philologia juris	42.	
11) Philosophia juris	43.	
12) Concordantiae juridicae	44.	
13) Tropi, formulae, adagia juris	45. 46.	
14) Arithmetica juris	50.	
15) Antinomicus minor	52.	
16) Institutiones juris universi	54.	
17) Institutiones juris Caesarei	55.	
18) Institutiones juris Saxonici	55.	
19) Summa titulorum	56.	
20) Leges numeratae	62.	
21) Versio legum Germanica	65.	
22) Ars hermeneutica	66.	
23) Juris naturalis elementa demonstrative tradita	71. seqq.	
24) Scientia nomothetica	76.	
	25)	

25) Breviarium controversiarum juridica-	79.
rum	
26) Tractatus tractatum reformatus	84.
27) Bibliotheca juris	85.
28) Loca classica seu sedes materiarum	85.
29) Vitae Jurisconsultorum	85.
30) Repertorium juris	86.
31) Pandectae juris novi	91.

Plura nunc non succurrunt, & aliquid mihi servandum est; revelavi tamen plura quam destinatum. Nullus prope paragraphus sine nova vel inventionem, vel contemplatione abiit. Non gloriam, sed utilitatem quaesivi publicam, alioqui nomen praescripsissem. Si quid me effecisse videro, tentabo minuire propositum proxime *catalogum desideratorum*: sin minus, ego me invidiae nota absolvi. Contemptoribus satis supplicii ignorantia erit. Veniet fortasse aliud tempus dignius nostro, quo, debellatis odiis, veritas triumphabit.

Hoc mecum opta, lector, & vale.

F I N I S.

